

明文在

和
345
/



利
298
1

東
學
校
印

明
齊
在

明治廿年三月廿三日
錢物
印

欽定四庫全書提要存目
蘇畫局開版

欽定四庫全書提要存目

明文在一百卷 國朝薛熙編熙有練閱火器陣記已著錄
是書仿昭明文選體例於諸體之中各以類從所錄亦頗存
鑒別蓋熙爲汪琬門人於古文有所受之也然數多則簡擇
難精世近則是非未定榛楛未翦則亦勢使之然耳

吾師半園先生既纂輯明文在編爲一百卷自爲序授鏞輩讀之
僉曰善於是鏞與同門生太倉徐子龍驤吳縣倪子霽仁和金子
彬輩謀鉅諸梓以廣其傳非先生意也既鏤版成諸子以鏞齒差
長宜有序鏞於是私於先生曰先生爲人孤行已意世之不悅於
先生也久矣世之好訾議而不樂成人之美者眾矣是編出而鏞
輩親受業於先生者知之深其不知者或議有明三百年之人文
具在採之而人物不備選之而棄取未當則奈何先生笑曰藏諸
可也鏞唯唯退一日又以請先生曰甚哉子之固也六籍之傳亦
有幸有不幸焉奚其備昔季札聘魯魯人爲之歌齊嘆曰美哉泲
泲大國之風必非敖辟驕志之音也則知太公以至四公時之正
風子札猶及見且聞之孔子與子札同時且詩又在魯而止錄哀
襄時之變風雞鳴以下十有一篇者孔子偶不及見其正風則齊
之不幸也至於時異勢殊而至殘闕失次者經傳中多有之豈孔
子之博觀而不能求其備歟蘇子瞻謂蕭統之文選選之未當淵

明集之可喜者甚多而獨取數首則知其忽遺者多矣至若子夏之序李陵之書蘇武之詩僞而不能辨宋玉神女賦自王曰唯唯以前皆賦而統謂之序甚矣其繆未可以一二數也奚其當於乎淵明之有忽遺淵明之不幸也然有專集在其他見於文選而無專集者斯人之幸也子乃言然子之固也鏞於是憮然曰善退而思之以是編而欲推尊於六籍之後則猶謂鏞輩之阿私若以之繼文選實有餘何也編次之法仿之而有加焉首賦次詩次騷次七次演聯珠次詔誥制冊次策問次檄露布次頌表箋啟奏疏次贊箴銘原議論辨說次書序記碑銘墓誌傳行狀次錄次書事雜志次冠詞字詞哀誄祭文次公移次題跋於乎有篇章以來可謂至於斯極者矣況有明之人文盛於齊梁之人文卽或採之未備則孔子之經已若斯選之未當則世之議統者又若斯不害其爲六籍爲文選也而文選以帝子之力何難搜羅之富乃僅而得碑二首狀一首墓銘一首誌又缺祭文一首何其寥寥乎數篇也以

視斯編當必有能知之者鏞於是應同門諸子之命述先生之意摹刻於先生序之次以告於世之成人之美者勿訾議先生也可康熙三十二年歲次癸酉長至日門人長洲錢大鏞謹序

明文在目錄

卷一

賦三首

卷二

賦二首

卷三

賦七首

卷四

朝會郊社樂章五十首

卷五

饒歌鼓吹二十四首 琴操十九首

卷六

古詩四言四首

卷七

古詩五言三十二首

卷八

古詩七言二十五首

卷九

古詩歌行二十一首

卷十

律詩五言一百二首

卷十一

律詩五言九十二首

卷十二

律詩七言八十首

卷十三

律詩七言八十二首

卷十四

律詩七言七十一首

卷十五

律詩五六言斷句七十五首

卷十六

律詩七言斷句九十五首

卷十七

律詩七言斷句一百二首

卷十八

騷六首

卷十九

七四首

卷二十

演聯珠五十首

卷二十一

詔九首 制四首

卷二十二

誥十八首 祝冊諭祭文七首

卷二十三

策問二十首

卷二十四

檄三首 露布三首

卷二十五

頌六首

卷二十六

表六首

卷二十七

箋五首 啟六首

卷二十八

奏疏三首

卷二十九

奏疏二首

卷三十

奏疏二首

卷三十一

贊十三首

卷三十二

箴十六首 銘二十四首

卷三十三

原二首

卷三十四

議六首

卷三十五

論五首

卷三十六

辨四首

卷三十七

說五首

卷三十八

書五首

卷三十九

書四首

卷四十

書五首

卷四十一

書七首

卷四十二

經史序八首

卷四十三

應制序九首

卷四十四

文集序十一首

卷四十五

詩集序九首

卷四十六

樂府序七首

卷四十七

志譜序八首

卷四十八

忠孝序十一首

卷四十九

紀遊序六首

卷五十

贈賀序十二首

卷五十一

送行序九首

卷五十二

送行序八首

卷五十三

壽序十首

卷五十四

壽序十一首

卷五十五

節壽序七首

卷五十六

學宮記七首

卷五十七

書院記六首

卷五十八

應制記九首

卷五十九

德政記三首

卷六十

圖像記五首

卷六十一

寺廟記九首

卷六十二

書齋記十首

卷六十三

書齋記十一首

卷六十四

書齋記十二首

卷六十五

山水記七首

卷六十六

山水記四首

卷六十七

工作記九首

卷六十八

勅建碑六首

卷六十九

聖廟碑七首

卷七十

精忠碑七首

卷七十一

勳德碑二首

卷七十二

神道碑三首

卷七十三

神道碑四首

卷七十四

墓碑八首

卷七十五

墓表十首

卷七十六

墓誌銘四首

卷七十七

墓誌銘三首

卷七十八

墓誌銘八首

卷七十九

墓誌銘六首

卷八十

墓誌銘五首

卷八十一

墓誌銘九首

卷八十二

墓誌銘九首

卷八十三

傳二首

卷八十四

傳八首

卷八十五

傳九首

卷八十六

傳六首

卷八十七

行狀二首

卷八十八

行狀一首

卷八十九

行狀三首

卷九十

行狀五首

卷九十一

錄三首 書事四首

卷九十二

雜志七首 銘三首

卷九十三

冠詞一首 字詞

卷九十四

哀詞二首

卷九十五

誄詞一首

卷九十六

祭文三首

卷九十七

祭文十一首

卷九十八

公移三十八首

卷九十九

公移四首

卷一百

題跋十九首

明文在目錄終

明文在卷一目錄

賦

北京賦

奉制撰蟠桃核賦有序

李時勉

宋濂

明文在卷一

常熟 薛熙纂
丹徒 何潔輯

北京賦

李時勉

惟皇明之受天命也我太祖皇帝首仗義師以平暴亂豪傑景從
聲振江漢削除僭竊拯民塗炭定鼎金陵撫綏萬邦乃睠茲土實
雄朔方倣成周之卜洛欲並建而未遑逮我聖上繼明重光握乾
御極一遵舊章仁聲洋溢乎遐邇恩澤汪濊於八荒旣致治於太
平遵皇衢以省方仰先志之未遂度弘規以作京羌經營之伊始
徧華夏其歡騰曰惟北都在冀之域右挾太行左據碣石背疊險
兮重關面平原兮廣澤宗恆嶽其巍巍鎮鑿閭而奕奕冠九州之
形勝實為天府之國是以軒轅邑之以分州唐堯階之以為帝擴
神化以宜民大勳德之光被鬱王氣之所鍾於今茲而有待也於



是仰瞻析木俯測地靈龜筮兆吉天人叶應神祇獻珍而山石自
出河嶽効靈而神木自行民子來兮相續期不日而功成爾乃懸
水樹泉識景表營方位既正高下既平羣力畢舉百功並興建不
拔之丕址拓萬雉之城引天泉於西阜環湯池而鏡清九衢百
塵之通達連費邃宇之縱橫顧壯麗其若此非燕逸而娛情蓋所
以強幹而弱枝居重以御輕展皇儀而朝諸侯遵先軌而布仁政
者也乃若四郊砥平皇道正直視萬國之環拱適居中而建極其
南則萬流宗海平林蔽天攬邯鄲鉅鹿之廣衍馳平疇沃野之綿
延溘淤恆衛經其野濡磁夾桑匯其前界以大陸廣阿之弘壤阨
以大茂井陘之連山包絡趙魏襟帶齊魯膏腴之地綿亘三千餘
里而極於黃河伊潁之川其水陸之所產卓犖繁盛蓋莫得而計
焉其北則疊嶂崑崙層巒蔽虧長城矗乎雲表百泉湧乎山隈壯
天關而設險守一夫而莫開偉左盤而右顧宛鳳舞而龍飛實磅
礴而鬱積粵擁衛於邦畿包狼山上谷之阻據野狐獨石之危掩

祖山木葉之離立連白登紫塞之逶迤控女真而極乎洮河之北
鎮朔漠而逾乎瀚海之涓騎射之雄虎豹之姿畏威懷德相率而
來歸其東則潞河通漕控引江淮肥如灤涑灌淫縈迴連峯片石
之隘首陽崆峒之匡玉田白璧神仙瑤臺超無終而越金山跨遼
瀋而逾鴨綠至於暘谷日出之涯固已遐哉邈乎而莫不在乎綏
懷環以大海眾水所歸洪濤巨浪洶湧崔嵬蓋不知其幾千萬里
而蠻商番舶帆檣隱天上下不絕而往來又有蓬瀛方壺鳳麟聚
窟十洲三島靈異非一流精之闕瓊華之室墉城崑崙金臺岑嶺
紫氣丹青景雲矚日靈囿倏安期羨門之倫相與游從乎其間
出入隱見而恍惚瞻帝京其伊邇庶可見其驂鸞駕鶴之髣髴其
西則崇山鬱翠高挹秦岱北接居庸南首河內奇峯擁關龍門阻
隘玉泉垂虹青煙浮黛上巖嶂兮倚空下蟠據而際海其麓則有
渾河湯湯西湖泱泱鹽溝琉璃桑乾廣陽雪波泛湧灑漾汪洋一
瀉千里會流帝鄉又有上林禁苑種植畜牧連郊踰畿緣邱彌谷

是仰瞻析木俯測地靈龜筮兆吉天人叶應神祇獻珍而山石自
出河嶽効靈而神木自行民子來兮相續期不日而功成爾乃懸
水樹泉識景表營方位既正高下既平羣力畢舉百功並興建不
拔之丕址拓萬雉之城引天泉於西阜環湯池而鏡清九衢百
塵之通達連費邃宇之縱橫顧壯麗其若此非燕逸而娛情蓋所
以強幹而弱枝居重以御輕展皇儀而朝諸侯遵先軌而布仁政
者也乃若四郊砥平皇道正直視萬國之環拱適居中而建極其
南則萬流宗海平林蔽天攬邯鄲鉅鹿之廣衍馳平疇沃野之綿
延溘淤恆衛經其野濡磁夾桑匯其前界以大陸廣阿之弘壤阨
以大茂井陘之連山包絡趙魏襟帶齊魯膏腴之地綿亘三千餘
里而極於黃河伊潁之川其水陸之所產卓犖繁盛蓋莫得而計
焉其北則疊嶂崑崙層巒蔽虧長城矗乎雲表百泉湧乎山隈壯
天關而設險守一夫而莫開偉左盤而右顧宛鳳舞而龍飛實磅
礴而鬱積粵擁衛於邦畿包狼山上谷之阻據野狐獨石之危掩

祖山木葉之離立連白登紫塞之逶迤控女真而極乎洮河之北
鎮朔漠而逾乎瀚海之涓騎射之雄虎豹之姿畏威懷德相率而
來歸其東則潞河通漕控引江淮肥如灤涑灌淫縈迴連峯片石
之隘首陽崆峒之匡玉田白壁神仙瑤臺超無終而越金山跨遼
瀋而逾鴨綠至於陽谷日出之涯固已遐哉邈乎而莫不在乎綏
懷環以大海眾水所歸洪濤巨浪洶湧崔嵬蓋不知其幾千萬里
而蠻商番舶帆檣隱天上下不絕而往來又有蓬瀛方壺鳳麟聚
窟十洲三島靈異非一流精之闕瓊華之室墉城峇堯金臺岑律
紫氣丹青景雲矚日靈囿偃佺安期羨門之倫相與游從乎其間
出入隱見而恍惚瞻帝京其伊邇庶可見其驂鸞駕鶴之髣髴其
西則崇山鬱翠高挹秦岱北接居庸南首河內奇峯擁關龍門阻
隘玉泉垂虹青煙浮黛上巖嶠兮倚空下蟠據而際海其麓則有
渾河湯湯西湖泱泱鹽溝琉璃桑乾廣陽雪波泛湧灑漾汪洋一
瀉千里會流帝鄉又有上林禁苑種植畜牧連郊踰畿緣邱彌谷

澤渚川匯若大湖瀛海渺瀰而相屬其中則有奇花珍果嘉樹甘
木禽獸魚鼈豐植煩育颺颺籍籍不可得而盡錄固可以因興陳
而校田獵選車徒以講武事乃遵國風稽王制詔期門簡將帥乘
玉輅擁翠蓋出天關而雷轟轍芳郊而雲會非所以威眾誇敵娛
樂騁意蓋將取不妊而除苗害狩無擇而順殺氣謹大易之用於
三驅之時驗騶虞之仁於一發之際水衡虞人之容與武夫壯士
之奮厲皆知夫仁者之爲勇而以投石超距之足鄙亦何必殄夷
禽獸割鮮野食而以俛仰極樂之爲貴也若夫其宮室之制則損
益乎黃帝合官之宜式遵乎太祖貽謀之良居高以臨下背陰而
面陽奉天凌霄以磊砢謹身鎮極而崢嶸華蓋穹崇以造天儼特
處乎中央上倣象夫天體之圓下効法乎坤德之方兩觀對峙以
嶽立五門高矗乎昊蒼飛閣帆以奠乎四表瓊樓嵬以立乎兩旁
廟社並列左右相當東崇文華重國家之大本西翊武英嚴齋居
而存誠彤庭玉砌璧檻華廊飛簷下啄叢楹高驤闔閭其蕩蕩

儼帝居於將將玉戶粲華星之爛晃璇題納明月而輝煌寶珠焜
耀於天闕金龍夭矯於虹梁藻井煥發綺窗玲瓏建瓴聯絡複道
迴衝軼霄漢以上出俯日月而盪胸五色炫映金碧晶熒浮輝揚
耀霞彩雲紅其後則奉先之殿仁壽之宮乾清坤寧妙麗穹窿掖
庭椒房閨闈通其前則郊建圓丘合祭天地山川壇壝恭肅明
祀至於五軍庶府之司六卿百僚之位嚴署宇之齊設比館舍而
並置列大明之東西割文武而制異至於京尹赤縣之治所王侯
貴戚之邸第辟雍成均育賢之地守羽林而掌飲飛者至九十而
有四衛莫不井列而綦布各雄壯而偉麗其巖廊之上則有皋夔
稷契之倫元凱俊乂之輩相與賡虞廷之歌談羲農之際罄補袞
之能懷忠貞之志考禮文於大備贊聲樂之盡美是以朝無缺政
德教漸暨薄海內外均陶至治幸其有作聿來趨事成此大功忘
其劬勤人和旣極休徵滋至慶雲瑞靄之覆於闕庭素鳥玄兔之
獻於丹陛醴泉屢出甘露數墜麒麟騶虞之珍馴獅天馬之類紛

紘雜選莫能殫記於以見天眷之益隆而聖德之純備者也於是
 正月上日工既訖工爰告成於天地肆紹美於祖宗清心疑慮齋
 沐肅雍粢盛既潔牲牲既豐芬郁郁以旁達靈續其來降錫嘉
 貺之穰穰介景福於帝躬將順應於昌期趾盛美於無窮乃服袞
 冕御帝座開九重之深宮受萬邦之朝賀內侯甸而要荒外殊方
 而異俗胥近悅而遠來紛鼓舞而匍匐方物溢以充庭多絢燦而
 駭矚率蹈舞於階除效華封之三祝爾乃浹和會昭景鑠鏗鯨鐘
 奏雅樂詔光祿以開筵台百辟而燕樂饌珍玉兮芳馨疊瓊漿以
 斟酌聯貂蟬以夾陛雜蠻夷之荒服莫不酣暢而飽德咸頌歌而
 踴躍越填城而溢郭藹歡聲於寥廓斯可以媿太古之無為慶華
 胥而踴栗陸顧皇上之謙抑視至治為未足於是降德音播嘉惠
 省刑罰薄賦稅汰冗濁旌廉吏舉賢才擢俊乂發倉廩賑貧賈尊
 高年而禮有德慎防禦而修武備貴爵重賞以厲廉恥厚往薄來
 以馭華裔蓋欲使人知所本土知所勵四方萬國無一民之失所

窮陬僻壤無一物之不遂舉陶於春風和煦之中而樂於雍熙泰
 和之治此蓋堯舜兢業之心文王敬止之意所以紹鴻業繼先志
 益宏遠而有偉故不勞而甚易冠絕乎前古垂休於後世固可必
 聖子之與神孫益昌盛而無替小臣微陋忝職文字願賦帝都之
 盛槩揚國美於萬禩復為之歌曰煌煌帝都兮逾鎬豐阻山帶河
 兮壯以雄天開日明兮王氣所鍾穹隆造天兮惟帝之宮廓氛祲
 兮開溟濛鎮夷夏兮宣皇風王道平平兮四方來同願皇圖之鞏
 固歷萬世兮無窮

奉制撰蟠桃核賦 有序

宋 濂

洪武乙卯夏五月丁丑上御端門召翰林詞臣出示巨桃半核蓋
 元內庫所藏物也其長五寸廣四寸七分前刻西王母賜漢武桃
 及宣和殿十字塗以金中繪龜鶴雲氣之象後鐫庚子年甲申月
 丁酉日記其字如前之數亦以金飾之所謂庚子實宣和二年字
 頗疑祐陵所書既奉旨撰賦垂誠方來臣濂謹按王母獻桃事詳

見張華博物志第八卷史補類華言桃七枚大如彈丸遺帝五自
食其二以今桃觀之且十倍於彈丸則其實之如斗可知矣豈華
出於傳聞而想像載之歟抑其言足信而後之好事者假託傳會
之歟不然漢武內傳所謂桃如鳧卵形圓而色青者又果何如歟
復按蔡京所記尚方有玉母蟠桃核頗鉅京嘗相祐陵其見與今
相符事當可徵然則傳志所載誠有不可信者歟臣敢忘其固陋
撰賦一篇俯伏丹陛以獻初則極其形容終則一歸於正其詞曰
炎漢六葉實惟武皇闡坤符握乾綱祀汾陰建竹宮仁獸在郊赤
芝薦房西海獻續弦之膠弱水來燕卵之香慶諸福之畢集思騎
龍於帝鄉幸靈桃之入口傳仙種於下方想其瑤階露寒形庭秋
迴銀燭未掩畫屏斜映啟承華之祕殿眇瑤池而神騁忽王母兮
遙臨託青鳥以傳命鬱佳氣之蔥龍覲芳姿之妍靚於是玳席初
延霞鷓屢傳蘭辭吐兮襲人縹袂舉兮高騫紫雲之輜輶躔駐九
微之燈火猶然乃啟錦幃乃濯翠邊乃出桃實獻於帝前味甘醇

而如醴色含腴以不乾鸞刀割蜜神液流泉上滋華池身輕欲仙
將懷核而種之刷上林之寒煙王母微笑塵世易遷倘花實之並
見歲屢閱於三千惟紫府之列真視滄海於桑田被窺鳥矚之小
兒尚奚測夫幽玄斯核也匪鑄而成非陶而凝藉五行之亭毒資
六氣以流形鄙瓠犀之脆薄並玉質之堅貞爪之不入叩則有聲
知何年之中析存半璧之晶熒俯貼金盤巢蓮之龜藏六仰承玉
露常滿之栝弗傾銳首聳兮尖岑豐下楸兮墜星眾皺蹙背文之
籀一窪暈面色之赭荷盤欲展蚌甲未扃藏仁之跡猶在含肌之
罅如生函肉好之隱約圍合線之交層龜鶴軒翥兮顯象寶章絢
爛兮金明鳳占鸞彝同藏真於天府星形月魄挾灝氣於蓬瀛嗟
夫自昔仙靈恍惚難憑出無入有變幻莫停橘類益兮巴園棗如
瓜兮漢庭恣燕齊之方士騁詭辨之奔騰瞻雲路之咫尺恨凡骨
之難登以雄才之蓋世甘昏溺而不醒至若建章月淡甘泉風冷
銅莖中峙仙掌高擎望飈輪兮不來徒馳情於窈冥苦白日之易

短兮竟莫制於頽齡核雖存而人則逝兮悲秋風於茂陵矧宣和
之繼軌兮慕鼎湖之龍升託青華之帝子設神霄之玄稱何殷鑒
之不遠踵覆轍其相仍天啟皇明真人龍興順堪輿之大化調陰
陽之至精道德行兮卽龍虎之丹顯忠信昭兮勝鉛汞之功弘以
九州爲仁壽之域儕兆民於喬松之朋神機流浹太和薰蒸指伎
人兮草生屈軼齊氣朔兮階秀堯冀視區區之遺核初何繫乎重
輕此所以革往古之荒唐法唐虞以作程也薛曰桃有核兮大逾
掌歷千齡兮多惚恍慨靈仙兮勞夢思誰見崑邱兮紫芝長真人
出兮海寓寧禮樂爲冠兮仁義作纓簫韶九成兮鳳凰鳴青鳥不
敢徠兮幻說清千歲萬歲兮永長生

竊記徽宗本紀宣和元年己亥二月庚辰改元遂易宣和殿爲
保和殿至四年壬寅夏四月丙午詔錄三館書置宣和殿及太
清樓祕閣始重稱宣和今核上之字刻於二年庚子之甲申月
乃不書保和而猶襲宣和之名此固不可不疑況丁酉日屬庚

子歲癸未月之終今復隸之於甲申月之首尤有不可得而致
詰者意此核非漢武時物字亦非宋祐陵書雜書所載海外之
國多大桃雖不可盡信或者得其遺核特依倣而託之者歟濂
年已邁舊學皆忘未必言之足徵也姑書以俟後之君子云

明文在卷一

明文在卷二目錄

賦

大韶賦 并序

貝瓊

明文在卷二

常熟 薛熙纂
長興 臧廷鑑訂

賦

大韶賦 并序

貝瓊

傳曰堯作大章舜作大韶韶繼也言舜能繼紹堯之德也周禮曰大韶禹樂名也言禹能大堯舜之德也前乎舜者堯非不繼譽也後乎堯者禹非不繼舜也特於舜言繼者法成乎堯也在譽之時法猶未成堯雖繼之而可繼之事未備舜協於帝在舜之時功爲已協禹雖繼之不足爲難矣則可繼之善善繼之功惟舜獨也是韶爲舜之樂無疑季札觀樂見舞韶簡者曰德至矣盛矣如天之無不覆幬如地之無不持載雖甚盛德茂以加矣後孔子學之於齊三月不知肉味曰不圖爲樂之至於斯也蓋知樂之盡善盡美莫過於韶宜當時感召丹朱在位羣后德讓祖考來格鳥獸踴躍

鳳凰來儀也然非舜之德致和於上夔之樂召和於下何以臻此哉故述而為賦不徒極其聲音之美而且本之舜之德云賦曰有東吳公子北走齊魯之疆觀於嶧山而見孔林之主人焉主人曰公子之遊也亦將有所覩乎曰無也生於震澤三泖之上僻陋寡聞竊慕禮樂之事而六律七均之制嘗究心久矣願有請於大人先生焉主人曰嘻吳會東南之天府而天下之善音萃焉然公子猶有所未足者豈將厭澹泊而說鏗鏘乎必將挾陳娥攜趙女摩鷓絃考鼉鼓若是以為樂乎公子憇然不悅曰霓裳之曲唐之所以播越也廣陵之散晉之所以分裂也固不足言矣若夫歌呼鳴鳴之樂無異紉之靡靡以亡其國者豈君子之所樂乎願聞其他主人曰七德之歌七德之舞太宗之肇王業也亦嘗聞之乎曰伯者之事子孫無所法焉曰漢祖蹴羸龍飛沛中置酒層臺悲歌大風造基四百光啟西東若是何如公子曰猶有伯心之存也駁而未純然亦一世之雄乎請言其上主人曰抑聞武之六成乎武

之濟河而西也馬散弗乘牛散弗服倒載干戈包以虎皮天下知其寢兵弗用也爰作武以象功焉鼓以戒眾久然後戰也長歌連延起其慕也發揚蹈厲時不可失也故一成北出再成滅商三成自北而南四成南國是疆五成分左右居周召六成復始而為天下王振鐸夾舞秉戈鷹揚若何如公子曰其容美矣此武事也未盡善也請言其上主人曰其惟舜之大韶乎當夫六府治三事和敘九功形九歌嶧陽之桐可以斲琴瑟焉雲夢之篠可以竅管籥焉泗濱之石可以礪而為磬焉荆山之金可以範而為鏞焉八音既具而大體短脰之屬有力而不能走者以之為鐘簾焉小體蹇腹聲清而遠聞者以之為磬簾焉其作也控以合之其終也揭以止之洪者鏗而充清者磬而介淒切而不流泛濫而可會當夫朝廷之燕享宗廟之祭祀於是而奏焉升歌在上匏竹在下代作間奏秩然有序或擊或戛或拊或搏清亮而高遠象乎天之渾淪廣厚而含容象乎地之磅礴一變一通兮四時之終始一散一潤

兮風雨之回合是時也熙熙然八荒一春浩浩乎洪荒大朴格三
苗於洞庭丹朱賓而有恪俯而聆之純如甘辛之相濟曠如有倫
而莫斂詘如斷玉之復續繹如驪珠之碎落飛流合而萬壑雷轉
清風生而天籟交作吟九困之老龍唳九皋之玄鶴既么妙而悠
揚亦和平而淡泊無急微噍殺以感其憂無暉諧慢易以感其樂
其動於物也客何為而肅若神何為而來思獸何為而舞於土階
鳳何為而翔於茅茨明協乎大章博擬乎咸池所以保無窮之治
以示安而不忘乎危也悼六龍之南巡歷蒼梧而上九疑阿母之
玉琯猶在湘靈之錦瑟空悲悵遺聲之寂寂叫有虞兮遠而然而
齊之有韶陳亡而流於茲也海外之有韶聖人之化播於蠻夷也
宜季札觀之而知德仲尼學之而忘味彼武之六極於陰特著其
武功此韶之九極於陽實昭其文治也公子以為何如公子乃避
席而謝曰至矣盡矣不可以有加矣主人曰未也請授以九德之
歌其一洪流橫曰玄黃判風氣開洪流橫民乃災五行汨帝為哀

禹治之啟始孩決九川平九垓百穀生田每每其二洪流殺曰洪
流殺兮民災既除山有鳥獸兮川有魚爰可食兮可居胥樂且歌
兮毋忘厥初其三三苗格曰惟聖賈聰撫有九圍蠢蠢三苗險阻
是依出師於南奮我帝威我師既還苗亦來歸其四四凶黜曰德
與刑兮國之經四凶斥焉八元在庭帝無為四海寧其五正德之
歌曰惟天降命物必有則民之曹曹胡乃自賊五教不形禽獸盜
賊聖人龍飛四方之極其六利用之歌曰水既平兮別九州下為
隰兮高為邱徒則軒兮涉則舟以羨濟乏兮百貨流財孔阜兮樂
且無憂其七厚生之歌曰下民孔艱兮遭墊溺寒我衣兮飢我食
我無民違兮父母職其八鳳凰來儀曰堯不德兮舜不辭授以天
下萬物治寒暑無易風雨時節韶九奏朱鳳儀其九萬世賴曰天
覆地載高廣莫測孰參贊是俾衣而食帝治天下如埏如埴萬世
賴之安知其力公子曰嗚呼禮廢樂崩幾千秋矣而始聞主人之
宏論乃復為之歌曰雅南已亡兮流盪曷正齷栗雷怒矣空桑無

明文在卷一
聲綠綺不陳兮薦檀槽與箏箏妖倡爲妍兮嘯鸞鵠而啼燕鷺孰
究夫大韶之盡善盡美兮實媿夫六英六莖後千載之聖人兮集
厥大成安得聞九奏於清都兮御天風而上征

明文在卷二

明文在卷三目錄

賦

友筠軒賦

方孝孺

思歸軒賦

王守仁

弔屈平賦

王守仁

試三農望雪賦

徐有貞

水仙花賦

徐有貞

頽山賦

黃淳耀

明文在卷三

常熟 薛熙纂
同里 歸允肅訂

賦 友筠軒賦

方孝孺

惟青青之玉立俯漪漪之軒構憩樂矣之幽情處蔚然之深秀蒼
雪洒乎涼飈綠陰蔽乎清晝春之時也暖律乍起和氣方剛對穆
穆之龍孫列斑斑之鴈行風節持以雅素體質直而端莊其夏色
也南薰解籟丹鳳來儀香馥纍纍而具簇密葉重重而翠圍笙簧
弭乎節奏珮玉鳴乎參差恥佳麗以褒雄據靜便而伏雌若一塵
不到之際萬事脫羈之辰渭川致乎斯景黃岡寓乎此身風徐來
而韶合雨初歇而香勻至若色侵書帙涼溢芳樽日穿漏以噴金
水環迴而嗽銀座擁碧筒之杯地敷翡翠之裯或彈棊而雅歌或
解衣而脫巾或焚香而啜茗或聯句而鼎真固平生以足樂雖百

罰而弗醺越若秋之與冬金氣肅兮萬木凋玄冥降兮羣陰驍履
霜兮冰將至摧枯拉朽兮焉逃稟抗雪之英姿健凌雲之高標或
強董宣之項或折陶潛之腰或簇白雲之調或作重華之韶既不
婉以不麗亦弗矜而弗驕世上有玉堂之貴此豈無寶牖之安乃
緩步以當車復謝崇而慕閒彼將聽晨雞而拜楓階此獨咀明霞
而扁柴關忘情於漢庭之寵避世於商陽之山至於侶魚蝦而友
麋鹿豈復對龍準而瞻龍顏采玉芝於蒼煙之表洗兩耳於清溪
之灣然而清則清矣未有得茲軒之真樂者也辭曰清清兮歲寒
之心温温兮琅玕之音君子居之兮實獲我心正俟命兮履薄臨
深君子處兮慨古傷今古人汨汨兮誰爭子所疏一器兮酒一觴
樂以忘憂兮歲月長羌彼五陵豪富兮乃積乃倉朝重白璧兮莫
手糝糠松花飯兮荷葉衣贖兩耳兮遠是與非朝其遊兮莫而歸
安得從子兮其樂有餘

思歸軒賦

王守仁

陽明子之官於虔也廢之後喬木蔚然退食而望若處深麓而遊
於其鄉之園也構軒其下而名之曰思歸焉門人相謂曰歸乎夫
子之役役於兵革而沒沒於微纆也而靡寒暑焉而靡昏朝焉而
髮蕭蕭焉而色焦焦焉雖其心之固囂囂也而不免於嗷嗷焉嗷
嗷焉亦奚爲乎槁中竭外而徒以勞勞焉爲乎哉且長谷之迢迢
也窮林之寥寥也而畊焉而樵焉亦焉往而弗宜矣夫退身以全
節大知也斂德以亨道大時也怡神養性以遊於造物大熙也又
夫子之夙期也而今日之歸又奚以思爲乎哉則又相謂曰夫子
之思歸也其亦在陳之懷歟吾黨之小子其狂且簡俛然若瞽
之無與偕也非吾夫子之歸孰從而裁之乎則又相謂曰嗟乎夫
子而得其歸也斯土之人爲失其歸矣乎天下之大也而皆若是
焉其誰與爲理乎雖然夫子而得其歸也而後得於道惟夫天下
之不得於道也故若是其質質夫道得而志全志全而化理化理
而人安則夫斯人之徒亦未始爲不得其歸也而今日之歸又奚

疑乎而奚以思爲乎陽明子聞之憮然而歎曰吾思乎吾思乎吾親老矣而暇以它爲乎雖然之言也其始也吾私焉其次也吾資焉又其次也吾幾焉乃援琴而歌之歌曰歸兮歸兮又奚疑兮吾行日非兮吾親日衰兮胡不然兮日思予旋兮後悔可遷兮歸兮歸兮二三子之言兮

弔屈平賦

王守仁

正德丙寅某以罪謫貴陽取道沅湘感屈原之事爲文而弔之其

詞曰

山黯慘兮江夜波風颼颼兮木落森柯汎中流兮焉泊湛椒醋兮弔湘纍雲冥冥兮月星蔽晦冰峻嶮兮霰又下纍之宮兮安在悵無見兮愁予高岸兮嶽崎紛糾錯兮樛枝下深淵兮不測穴瀕洞兮蛟螭山岑兮無極空谷谿飭兮迴寥寂猿啾啾兮吟雨熊羆嗥兮虎交蹟念纍之窮兮焉託處四山無人兮駭狐鼠魍魎遊兮羣跳嘯瞰出入兮爲纍奸宄嫉纍正直兮反詆爲殃昵比上官兮子

蘭爲臧幽叢薄兮疇侶懷故都兮增傷望九疑兮參差就重華兮陳辭沮積雪兮礪道絕洞庭渺邈兮天路迷要彭咸兮江潭召申屠兮使驂娥鼓瑟兮馮夷舞聊遨遊兮湘之浦乘回波兮泊蘭渚睠故都兮獨延佇君不還兮郢爲墟心壹鬱兮欲誰語郢爲墟兮函嶠亦焚讒鬼逋戮兮快不酬冤慙千載兮耿忠愍君可復兮排帝閭望遁跡兮涓陽箕罹兮其佯以狂艱貞兮晦明懷若人兮將予退藏宗國淪兮摧腑肝忠憤激兮中道難勉低回兮不忍溘自沈兮心所安雄之諛兮讒喙眾狂穉兮謂纍揚己爲魑爲魅兮爲讒媵妾纍視若鼠兮佞頹有泚纍忽舉兮雲中龍旗掩靄兮飄風橫四海兮倏忽駟玉蚪兮上衝降望兮大壑山川蕭條兮漭寥廓逝遠去兮無窮懷故都兮蜷局亂曰日西夕兮沅湘流楚山嵯峨兮無冬秋纍不見兮涕泗世愈隘兮孰知我憂

試三農望雪賦

徐有貞

維聖王之建極位天地之正中廓四海而無外致九州之會同六

府順敘三事允從乃敦八政務先農功辨諸土之物宜肇萬井之
 提封地有高下夫有上中比廬聯屬溝洫交通畊則均力而合作
 穫則計畝而分庸肆斯民之知本咸豐登而趨於農也於時歲舍
 星紀月將值子道塗既除天根見矣河水涸而成梁場工畢而儲
 侍黃鍾應律陽氣伊始書雲告祥候風分祉人心和而物情美俟
 開歲而舉趾皆閔閔以祈迎占三白之有喜方夫雲之未同風之
 未起顛然望之若將雪而復已也於是諸農有居山澤者有居平
 陸者上焉者下焉者相與齋咨而語不能安處一其心思而祈雪
 之雨焉爾其聚眾而雩於壇之上駢足而立翹首而望冀天道之
 感通想鬼神之情狀號飛廉而召滕六延屏翳以俱往幹化機於
 須臾凌玄虛而下上少焉風之緩者以駛雲之漓者以濃一氣無
 垠六合為同粲紛紛其下雨飛素華於太空見先集之維霰後霏
 霏之無窮輕若游絮密若走蓬散如珠璣積如璧琮著木成蕊泊
 草生茸遇境而晝逢隙而封塗瑤鋪而瑩潔透瑣窗而玲瓏青山

為之變色綠池為之改容化萬殊而為一見物情之大同若乃神
 京作極魏闕雙直玉樓十二瓊筵四七抗層臺於雲表擢飛莖於
 霄側冠珮輝煌而竝進旂旄璀璨而分植儼然如百靈之會明庭
 肅然如眾星之拱辰極斯太平之氣象可覩而豐登之嘉兆可識
 矣於是三農之老相率望闕而歌歌曰惟茲雪之零兮慰吾民之
 情兮遺蝗伏藏年穀其登兮東作有祥力我畊兮又歌曰惟茲雪
 之零兮遂吾民之生兮年穀其登匪由民之誠兮惟帝德之徵兮
 已皆載拜而退小臣斯採焉請藏金匱

水仙花賦

徐有貞

百花之中此花獨仙孕形秋水發采霜天極纖穠而不妖合素華
 而自妍骨則清而容腴外若脆而中堅匪凡工之瑯刻伊玄造之
 自然夔獨出乎風塵之表兮憺幽真以忘言爾其族生瓊洲分植
 琪榭華宮琳館靡所不舍先春而開後春而謝妝不假於粉黛香
 何藉乎蘭麝時從變乎炎涼景無殊於晝夜若乃芳敷南澤翠發

中坻如王母之宴於瑤池秀挺芳田英翹蕙畹又如上元之游於閨苑至於微雲細雨乍伏乍起彷彿巫靈夢彼楚子輕陰薄陽半露半藏恍惚慮如見彼陳王或倚修竹露華朝濕一似湘娥掩袂以泣或傍寒梅月影宵浮復如漢女弄珠而游或侶幽蘭碧霞之壇有若文簫之遇綵鸞或依蕉綠層臺之曲有若蕭史之偕弄玉皎皎乎其若飛瓊粲粲乎其若雙成綽約乎其若神人之處姑射澹泊乎其若素娥之居廣庭或疏或密或信或屈叢者如隱擢者如出千姿萬態狀莫能悉然此特舉其形似之末而未究其理趣之實也是故冰玉其質水月其神挾梅兄與礬弟接桂蘭之芳隣宜紉佩於君子亦結褵於幽人臭不效於猶香不染於薰操靡摧於霜雪氣超軼乎埃氛懷清芬而弗眩兮乃獨全其天真非至德之世上器之人孰爲比擬而與之倫哉亂曰清兮直兮貞以白兮發采揚馨含芳澤兮仙人之姿君子之德兮

頽山賦

黃淳耀

黃子遊豫章見水次有山塊然生黝然黑骨然立草木泥土一不得附麗焉徵其名於土人皆不能答黃子曰噫此頽山也放於寂寞之濱不能出雲雨見怪物感而作賦且責且譽焉
茫茫太始厥初生山下根坤軸上薄玄間擢草木而爲髮涌金銀而發顏含陽吐霧祇包鬼關三浮瀛海五鎮人寰鳥飛翻兮不極猿狡黠兮難攀峰復峰兮碎律澗又澗兮潺湲吾獨怪夫南斗元精西江洪秀割爲此山肖形惟陋營脈不分首脊相督側瞰無林平觀失岫合類金鷲分侔飪靈草避而不生霧霞舉而莫就巨靈擘之不能離始皇鞭之不能走吾得諡之曰頽異古初之所授有如鼇岫春過蓮崖雨徧樹合疑屏花開似面樵客往而路迷羽人來而目眩時維此山頽然不變如彼朱門繁華相扇季路原思不離貧賤又若凜秋勁冬千山其空桂枝蔥蒨松蓋寥籠霰雪加而如怒瀑泉激而生風時維此山詘然翦翦如彼亂世干戈相雄黃公綺季保其童蒙至若兩孤奇絕廬岳怪偉翠撲雲端繡鋪谷

裏遠喻連衡近同壓壘千巖仰之若附庸萬嶽奔之若兒子嗟此山之不朝類海國之負恃彼萬夫之仰觀翳仁者而樂之相陰陽而卜宅奉牲璧而禱祈非巨地而凌轢百國即觸天而雲雨四陲苟其頑也類此復奚取於山為若夫劫火揚灰洪流滅木澤竭伊洛之源鐘響銅山之谷壞碑沉滄海之濱跛羊上廢臺之麓則此山之堅完雖一毫而不縮有踞齒之雕虎暨修頭之赤精日經營乎窟宅思咀嚼乎含生畏此山之發露乃歛爾而遐征彼蛟龍之跳波雖捧土而莫爭立此山於堤岸類此屹然之金城桑沃若而春美黍翼然而秋成合大氣於坯渾配神功之無名吾不知在天地者幾千萬載豈夫人之所能輕方丈緜邈石閭杳冥吾將游六合而遄返求至道於山英

明文在卷三

明文在卷四目錄

樂章

朝會樂章 凡二十六首

朝會樂章 凡十二首

祭告天地樂章 凡十三首

王國祀仁祖廟樂章 凡八首

廣漢難辭

銅井迎送龍辭 闕

迎日辭 闕

顧景祿
王寅
梁寅
宋濂
宋濂
唐肅
唐肅

明文在卷四

常熟薛熙纂
宣城梅清訂

樂章

朝會樂章凡二十六首

顧祿

升座

樂奏泰安之曲

金門洞開寶座尊崇煌煌龍袞穆穆聖容俯臨萬國高拱九重臣民稱賀玉帛來同

樂奏治安之曲

萬乘天臨千官景從濟濟卿士秩秩王公造班鴛鴦接武夔龍同心協德永効公忠

上壽

樂奏壽安之曲

天眷聖皇應運開基尊臨大寶撫有華夷武功底定文德弘施微臣曷報仰稱壽卮

君親之重實爲臣綱至尊至敬著在天常仙韶按曲玉醴浮觴載
仲華祝萬壽安康

舉酒

樂奏嘉禾之曲

有美嘉禾勃如雲興一莖九穗異畝同榮至和所召盛德之徵薦
諸郊廟用慶豐登

樂奏卿雲之曲

天上垂象著於卿雲九苞鳳彩五色龍文迎風郁麗映日網緼有
徵斯應實惟聖君

樂奏紫蓋之曲

聖人受命紫蓋呈祥亭亭錦覆熒熒霞張天中屹立雲際飛揚眷
茲靈祐國祚隆長

樂奏彤旗之曲

在昔征伐旗纛爲先仰惟聖朝著象於天彤竿對峙赤羽文鸞克
敵之應萬方歸焉

樂奏神芝之曲

后祇效德神芝挺生暉暉三秀濯濯九莖紫蕤絢彩綠葉敷榮願
著聲歌播於大廷

武功之舞

聖主承天運臨濠樹義旗萬方思麗日一劍奮興時采石方收捷
金陵卽駐師神機安可測建此萬年基
大命歸眞主羣心屬至尊神功參造化英略定乾坤永洽雍熙治
弘惟曠蕩恩華夷俱奉貢冠帶入天門

六成

江漢親征日風雲睿算中六師方奮武孤寇已潛蹤矢石飛星急
樓船烈火攻興王天已祚次第靖羣雄
萬乘龍飛始東吳尙陸梁天兵將問罪驕虜敢稱王負固三時久
終成一戰降山河畿甸接表裏壯金湯
陝右遺梟獍山東據虎狼神威方遠及小醜孰能當飲馬黃河上

觀兵華岳傍來蘇人望切載道獻壺漿
王師若時雨隨地霑恩波東浙爭歸款南閩已戢戈山川回正氣
田野起謳歌一洗兵塵淨羣生樂泰和
巴蜀雖云險區區在一隅偏方寧自守逆豎謾狂圖正類蛙藏井
真成虎負嵎神兵飛渡入俄報定成都
大將承王命長驅向北征揮戈清朔土按轡入燕城圖籍登天府
車書混玉京從容歸奏捷萬姓共歡迎

文德之舞

一統皇圖大三陽泰運開王侯鳴珮入蠻貊獻珠來瑞靄騰金闕
祥雲護玉階太平人物盛鼓舞樂春臺
雞鳴欲曙天冠蓋集羣賢拜舞瞻龍座懽愉侍御筵玉杯傳法醞
仙樂奏宮懸願祝君王壽齊稱億萬年

六成

五彩眩晴虹神都王氣鍾石城嚴踞虎鍾阜鬱蟠龍宮闕天光近

金湯地勢雄四方均貢賦萬國敬來同
皇朝崇祀典聖主每齋心天地嚴昭格神祇肅降臨牲牢歆大享
金石奏清音三獻精誠至端知錫福深
創業知非易圖安念守成帝心常簡注皇業在經營修德承天意
推誠軫物情一人恢大業萬國仰昇平
盛典稽前古皇心協至公建儲安國本裂土錫王封玉冊加殊禮
金支衍大宗羣臣無以贊三祝但呼嵩
宵旰思賢切旁求滿四方山林登隱逸朝野慶明良際遇風雲會
瞻依日月光同心匡盛治竹帛永流芳
淮海聖人興羣方仰大明海波俱帖息年穀屢豐登玉帛來諸國
梯航貢上京臣民咸舞蹈萬歲賀朝廷

還宮

洪惟聖主端冕凝旒高躋舜禹遠邁殷周功成治定禮備樂修受
天之祐萬歲千秋

朝會樂章 几十二首

王景

嘉禾進

天命有德之舞

堪輿寧叶氣蒸萬彙茁嘉禾生祥飈瑞露凝光精一莖九穗有三
登田峻駿奔進天廷薦宗廟將德馨時和歲豐樂太平乃知天子
在樹德雲龍風虎開休禎

野蔟成

瑞道昌至治明萬化滋植盈八荒猗歟野蠶集我條桑載生載成
以玄以黃以登於明堂至和磅礴黻文章縑為五采絲上補虞
舜裳

騶虞獻

騶虞至周服至仁表天造飢不食生畜行不踐生草聖皇御宸極
德澤被枯槁林邑神聖初召南風化首邁遐躅前無偶啟貞符垂
永久

神龜呈

箕疇演洛之靈玄龜出聖之徵皇孝理表八紘役五神策六丁肩
五總符十朋介金石利永貞天子九九八十一萬歲壽與天齊并

黃河清

黃河清七百里水精宮下見底聖人在位天心合并六合澄清萬
國文明捐雜佩兮蒲津遺玉玦兮龍門川后蹠而陳辭兮錫蕃釐
於聖君

四夷來

天子踐祚宏拓皇謨義聲翕沓陰肅陽嘘東款扶桑西徼余喜瀚
海祝栗統為一家繩牽索引咸傳於都莫不震懼天休涵濡狺狺
狺狺以拱宸樞玉帛匪頒王會有圖萬歲千秋協我貞符

黃河澄清

明德新民之舞

聖人召和黃流獻奇澄波清且漣漪歎薄龍門震蕩坤倪萬雷吐
張光燭化機上一碧機動天隨天啟聖神河水為清天啟聖神
治化底成聖德天齊造化降精聖德天齊心與道凝萬國一統聖

聖相承

嘉禾同穎

祥開函宇地出嘉禾端倪叶應大瑞是荷同穎異畝瑞協周家以
濯仁風以昭泰和惟皇忠厚被草木懋昭大道同變化是知聖心
能致和上與天運同亨嘉

慶雲成彩

德動天鑒慶雲呈祥紛為華蓋燿為天章郁郁芬芬靉靆茫茫映
日烜彩隨風飛揚昭回麗河漢覆燾彌下方神聖揚清芬溥暢融
天光

龍馬來廷

天之駟龍之媒產大宛徵渥洼追流星籀天街汗流赤心九垓歷
閭闔觀玉臺西風十二閑爭稱龍馬來蹴踏五雲暖神光夜昭回
誅蕩蕩天門開

甘露降祥

和氣叶甘露凝陋寶養軼金莖厭厭浥浥穰穰熒熒而於粲其英
如錫如飴如珠如脂不隨日以晞天子神聖與天合德至和攸繹
以濡天液天子聖神與天同甄至和氤氳以播靈芬瑞應之彰有
苾其芬於萬斯年受天之慶

四夷咸賓

聖皇御天治化攸甄文武並用其幾孔神極日月之所照莫不獻
贊而效珍普天率土悉妾悉臣環拱北辰以沐至仁德懋被乎芻
爽聲教暨乎八簣陋漢唐之用師侈成周之王會其道斯何王者
無外

祭告天地樂章 凡十三首

梁寅

迎神

天道大矣物繇以生地道廣矣物因以成惟鴻恩是資惟禋祀是
明神之格兮瞻續紛其並迎

奠玉幣

奠以嘉玉粟而温兮薦以重幣燧其文兮庶鑒茲哉斯禮之存兮

奉牲

既虔我祀既具我牲角貴繭栗心之誠有苾其芬于豆于登五音會合和而平

上帝酌獻

仰明明瞻巍巍如事父栗以夔物莫稱德曷報之酌用陶匏斯其宜

地祇酌獻

勢廣厚德含弘五行具百物生承天之施功之成何以報貺醑惟馨

上帝亞獻

父事惟天格神以心赫赫在上洋洋若臨樂既具止有鏘其音酌言再之庶明明之降歆

地祇亞獻

母事惟地物無不載九穀既登百貨是賴罔敢煩而瀆罔敢忽而怠昭茲嘉貺沛兮未有艾

上帝終獻

禮行匪懈祀事孔明瑤席菲菲華燈煌煌豐我粢盛潔我豆觴陰陽之和邦家之昌

地祇終獻

六府孔修生我兆民富媪之功陸海之珍洞洞屬屬清醑以陳所佑雖德禎祥其臻

分獻

鸞輿下臨從百神金支秀華耀五雲壇峨峨靈欣欣位以序列享明禋

徹俎

禮嚴厥初尤慎乎終徹以示敬儀雍雍嘒嘒管簫五音從望燎瘞

在縑維玉在筐維幣禮從厥初迺燎迺瘞屹立以瞻匪終怠

送神

神颺若馳喬零上翔蒼龍並騰車以行顧茲瑤壇兮尙有榮光

王國祀仁祖廟樂章

凡八首

宋 濂

迎神

樂奏清和之曲

皇圖聿崇茅社受封禮雖分孝思則同緬懷世德源深流鴻報本有祀式昭神功

奉牲

樂奏慶和之曲

王國之東清廟翼翼奉我皇祖享祀弗忒薦以牲牲敢曰充膺神其迺嘗純嘏是錫

初獻

樂奏保和之曲

皇祖載德既涓且仁弗耀其身委祉後人睠茲藩服典祀維寅清醴方薦歆其苾芬

亞獻

樂奏清和之曲

穆穆靈宮庭燎有煒貳觴載升神其樂止其樂伊何錫我繁祉磐石之宗本支百世

終獻

樂奏成和之曲

神兮下臨陟降在庭不見其形如聞其聲冷風肅然達於兩楹禮成三終神保攸寧

飲福

樂奏成和之曲

神具醉止威儀孔肅曰爾孝孫來飲爾福介爾眉壽膺爾百祿子孫保之以引以續

徹豆

樂奏嘉和之曲

禮備樂舉祀事攸宜孰其尸之廢徹不遲皇哉神惠覃及我私靈氛將逝如何勿思

送神

樂奏德和之曲

杳兮忽兮神運無迹鸞馭上征星流颺疾其靈在天其主在室億萬斯年孝思無斁

廣漢難辭

宋濂

難古禮也周人三時皆行之春冬之季難難陰氣也仲秋之月難難陽氣也蓋二氣或伏厲將乘之為灾故難以止焉其制命方相氏帥百隸索室區疫以逐之又磔牲以禳四方之神漢襲周制而其儀加詳選中黃門子弟百二十人為振子赤幘皂制執鼗方相黃金四目蒙熊皮玄衣朱裳執戈揚盾十二獸有衣毛骨中黃門行之冗從僕射將之以逐惡鬼於禁中夜漏上水朝臣會侍中尙書御史謁者虎賁羽林郎將執事皆赤幘陞衛乘輿御前殿黃門令奏曰振子請備逐疫於是中黃門倡振子和其辭凡八十言繼作方相與十二獸舞譟呼徧前後省者三持炬火送疫出端門門外騎士以次傳火棄雒水中自漢至今朝廷之難雖廢而民間猶有存者先臘一日巷氓社隸飾鬼神貌御五色龍虎文衣巡門擊鼓而難之子惡其言鄙褻因疏古者用難之意復廣漢辭使習焉其辭曰

陽陰乘化左右而行日厯昴畢得積屍大陵其氣勃芒更涉虛危墳墓西司鬼官攸房厲附強陰而降於躄矻咨爾十二神宣其威良焱突劔亢腓胃食虎甲作食殉雄伯食彪騰簡食不祥攪諸食咎伯奇食夢祖明強梁其食磔死寄生委隨食觀錯斷食巨剗其腎腸窮奇騰根同享於蠱母使害傷咨爾十二神鍛爾戎兵出輓四方吮厲之益以代酒漿解厲之肌以充糗糧絲厲之臄織以為衣裳斥除慝陰暢回明陽乾坤載清物楸民叩惟爾神之功神或不獲上帝是明急急如律令

明文在卷四

明文在卷五目錄

樂章

大明鏡歌鼓吹曲 十二首

平元鏡歌鼓吹辭

琴操 一首

琴操 二首

琴操 一首

琴操 二首

琴操 十首

王士紳
楊士奇
宋廉
胡翰
劉基
王禕
朱右

明文在卷五

常熟薛熙纂
長洲范必英訂

樂章

大明鏡歌鼓吹曲十二首

并序

王紳

臣幸生明時獲際雍熙之治世職儒業而又叨竊祿位伏觀太祖皇帝手提三尺取故元平僭亂以肇造區夏其功不在湯武下今奉制取漢魏以來所載鏡歌鼓吹詞效其體為十二篇以紀豐功偉烈曰大明鏡歌鼓吹曲以上用之命將出師之時軍旅行陣之間亦可以知祖宗締造之艱難與佐命元勛之勞烈臣不勝惶愧之至

元季亂極四海兵興太祖皇帝起淮泗平僭亂正大統為

神龍躍第一

神龍躍奮滄溟耀光彩揚威靈沛厥澤甦羣生德所被枯者榮著

仁譽藹義聲壹戎衣天下平混華夷俱來庭歲僅周武功成考厥績如日升萬斯年昭大明

右神龍躍二十句句三字

蠻子海牙以舟師扼采石王師與戰克之為殪奔鯨第二鯨之奔勢甚張率醜類橫大江礪厥刃比厥航聯伍為什黠且狂皇旅奮義旗揚兵所指冰沃湯衝其要扼其吭有弗若者嬰以鉞鯨既殪授我疆天兵赫赫從此光

右殪奔鯨二十句十七句句三字三句句四字

元將據建業天兵擊之為開洪基第三

江之表惟建康負天塹勢莫強彼昏不知肆譎張恃其險干天常皇震怒整戎行義旗一指元馘亡授我首啟我疆大業已建洪祚

右開洪基十六句十三句句三字三句句四字

陳友諒據豫章太祖親征之大戰鄱陽湖友諒死降其眾

為平江漢第四

江漢湯湯厥惟豫章醜虜凭之以恣寇攘屢涉我疆以跳以踉天眷有明命我哲皇爰整其旅以扼其吭戈矛洗洗旂旄煌煌部伍行行解艘將將塵戰大呼雷轟電揚虜酋既斃虜眾亦降凱歌以還形於樂章於赫武功上媿商湯

右平江漢二十二句句四字

張士誠據全吳命師縛之為縛狡兔第五

遷趨狡兔固其窟穴踰伏草萊肆厥慧黠跳踉三吳馳突兩浙皇命征之授以節鉞桓桓虎臣鷹揚大桀兵不留行刃不載血力屈智窮自貽机梗銜璧而歸繫以縲繼民夷既平天討斯揭偉哉豐功允矣超絕

右縛狡兔二十句句四字

元順帝能知天命舉族北歸燕京悉平為平元邦第六元運既去如秋之索德政不修疆宇日削爰肇我邦於彼朔漠義

旗所指摧山震嶽君臣稽顙若崩厥角舉族遠遁不待誅縛既屋其社寰宇清廓伊誰之力惟皇先覺

右平元邦十六句

字四

方國珍自元末跋扈東海命將征之舉族來歸為海波平

第七

元政既不綱萬國兵搶攘梟雄利草昧突起溟海旁名號僭相加
狼貪狼如羊大舶連百艘雲濤相擊撞葦爾鯁窟窟自擬蛟龍藏
天兵渡東浙疾若列缺光投戈載妻子逃匿海中央尋復係厥頸
來詣轅門降震雷既輯聲朝暎出扶桑帖爾波不興浩劫塵不揚
殘民沐文化宛若鄒魯邦

右海波平二十二句

字五

陳友定據全閩出師執之為拓閩境第八

真主起淮泗沛澤加無垠陳氏逞顛獬烽火連七閩自恃險且遠
偃蹇不我臣天兵忽爾加奮擊速且神執訊仍獲醜困彼涸轍鱗

凱旋獻俘馘磔裂徇頑巽海塹遂清靜千里無纖塵羣民樂蕃息
煦煦涵陽春

右拓閩境十六句

字五

張師道李思齊據關中天兵平之皆入職方為定關陝第九

元德昏政棼棼氓戚顛顛於旻情上格命明君二豎無職方猜猜
梗我化據中原王師下加猶不循雄兵烈烈車墩墩鐵山且碎虜
曷存褫爾魄奪爾魂殲厥渠魁弔厥民關陝平蕩無妖氛

右定關陝二十二句

字六

元社既屋苗裔猶存大兵再加窮極北漠而元遂滅為蕩

元穴第十

元氏有天下蕩析我中原施政裂綱紀士效無稽言聖人受天命
遠續皇王傳手提三尺劔起自淮泗塹削平諸僭亂元遂竄鼠然
屏迹雖甚邈天討不可延窮追及沙漠巢穴無復全卓哉皇業勳

上雪唐宋宛

右蕩元穴十六句句五

明玉珍據全蜀僭大號師出討之舉國來降為闢川蜀第

夏明氏據全蜀僭大號保西隩恃其險遠弗臣伏我師征之兼水陸搃厥吻搗厥腹以杖擊地駭神速焚爾櫬受爾玉待爾不死恩尤篤陶至和被清穆五十四州歸化育

右闢川蜀二十句五句句四字

元屬梁王保雲南招諭不降師出征之梁王死六詔平為

斯苞枿第十二

巨木既蠹根本猶傾爰有莠枿猶假息以生皇曰肆哉毋讟我兵俾其自歸庶不戕我氓屢遣使命諭以至誠蠢茲弗靈恣其頑冥皇赫斯怒爰整旅以行熊羆百萬如雷如霆摧朽拉枯烈烈轟轟殘孽既殲爨燹悉平遐邇歸化四海由以寧

右斯苞枿二十二句十八句句四字四句句五字

平元鏡歌鼓吹辭

楊士奇

臣聞兵者聖人所以衛民之具也故為天下國家者不可一二日而忘武備易曰除戎器戒不虞書曰克詰戎兵至若征伐蒐狩具見於詩禮春秋皆聖人重武事也洪惟我國家肇膺天命武以靖亂文以經邦列聖相承其道一揆陛下嗣承大統恢弘化理海內海外日月所照臨之地其人皆據誠効順祇奉方物朝獻闕下惟朔漠殘孽叛服不常屢寇邊陲擾我黎庶乃今歲之秋田穀登場三農畢務皇上因田獵以閱武龍旌所向於畿東郊而東北塞垣不遠伊邇遂戒六御親飭邊防車駕蒞薊州之石門邊報殘孽入寇已迫塞下上曰天厭其惡俾來就斃乎將士皆踴躍思奮上曰兵貴神速朕以鐵騎先馳赴之當令迅雷不及掩耳爾將士以次徐來即日率鐵騎三千出喜峯關翼日與殘孽遇孽駭愕出不意謂神兵自天而下也上麾鐵騎為左右翼前包孽陣飛矢如雨

孽狼狽死者甚眾餘率裹創退走上以鐵騎數百繞出孽後盡獲之遂斬其酋渠而生繫其眾孽無一跡得遁者遂命將士搗孽巢穴而悉收其部落族屬及所畜聚駝馬牛羊輜重以累萬計關塞以北蕩然一清臨邊之氓安枕無虞臣惟皇上聖志宵旰孜孜篤在安民車駕之初出也因農隙以講武事因所歷以飭邊防非有意殺伐也而天絕小醜將授其命於聖明故使之豺豕跳踉而天戈一麾瞬息之頃灰滅漸盡此皆本於皇上愛民之仁得天助佑而明斷天縱英武神奮遂建廓清之大功蓋近代帝王所鮮有也臣嘗考見古昔盛時帝王建武功者皆有饒歌鼓吹樂辭被之絃歌用示永遠臣忝執筆從屬車後目覩聖武神功之盛不能自默謹倣漢唐篇數撰饒歌鼓吹曲辭十二篇庶幾宣著盛美於無窮焉謹錄上進伏惟睿覽

皇聖仁恤元元勤宵旰保厥安顯氣肅零露溥田穀成農乃閒駕

六御獮於原颺蕩氛景凝春導旂常翼旛衛弓矢從羽千鑾雍雍鼓闐闐行郊畿歷山川遊豫時兆庶歡

右田獵之曲二十二句

車駕及石門驛邊城奏殘孽入寇遂定親征為邊奏第二嚴警蹕先皇輅坦坦砥如薊之路東石門陜以阻士鷹揚奮飛度有來匪函奏龍御謂虜殘孽呈邊侮皇曰噫嘻虜曷恃而來自投於隕天俾之天所俾予敢稽斲厥渠縛厥徒孽之殲其在斯

右邊奏之曲二十二句

車駕出喜峯關道陜而險將士奮勇以從忘其勞焉為度

關第三

度關山履巘岈陜以峻十步九屯旅肅肅氣桓桓凌奔崖越飛湍斂旄鉞包旌干潛鋒韜鏑捷羽翰龍御所歷祥景暄虎豹遠遁跡陰霧披以散但望殺氣遠塞垣孽冥昧尙恣兇殘皇威一震奮擊下九天

右度關之曲二十二句

車駕出關一戰殄孽悉戮其渠帥生繫其徒為皇武第四
皇武揚奮自天智以勇機捷神左麾右斥鐵騎奔捲如電掃呼霆
震褫殘魄懾殘魂摧餘陣蕩餘羣蹂躪泥滓揮埃氛燎毛斧耕歛
以塵停龍劍息虎賁霽天威怡天顏

右皇武之曲二十句

分命將士索孽巢穴用竟天討為天討第五
麾將校窮幽僻搗巢窟歷山澤索種類搜部落逐聲影躡蹤跡驅
孳畜舉聚積囊包席捲累萬億氛翳蕩羶腥滌陰山清瀚海碧曠
澄朔漠之北萬斯年神武績

右天討之曲二十句

兇愍既清遂撫安邊岷為安邊第六
斬蛟鰐禽犬犄疆場靖寧聖不忘備修防禦申警戒咨爾邊之岷
我緩我懷祛爾害灾康爾危爾勤爾生罔畏疑力爾田桑去爾寒

與飢爾安爾老爾幼爾慈疇爾厲辟以治疇爾厲予在茲

右安邊之曲二十句

武功既成詔告中外為武成第七
皇仁威靖疆圉皇聖志布昭於下渙德音周率土維時烝民受天
之付與圖保厥付勤且與暮有其毒之敢康弗赴斲之繫之匪予
志究武敬天之付亦承厥佑助猗皇仁承天祐

右武成之曲十八句

邊圉既寧下令班師為班師第八
氛塵息邊徼清武功建皇心寧鏡箭作凱奏興六龍御八鸞鳴祥
鸞翼輦慶雲承旌傳警修途班師上京大明行天川嶽光榮太和
融鬯萬物遂成美洋洋騰頌聲

右班師之曲十八句

車駕旋京行獻俘禮為獻俘第九
維大寶承於祖考維下民祖考是保克時永保維皇聖孝維皇聖

仁惠保暨濱徼彼狂以擾肆用劉勦馘與俘祇告清廟翦根與莠
穀用秀好維祖考之制欽率允蹈皇神武往有耀

右獻俘之曲十八句

既旋勞賚將率為勞率第十

皇振旅皇明堂賚將率以勞以享奏常武歌杖杜皇曰爾來予股
肱心膂維時武功俾民遂保豈維予克奮汝良予輔咸拜稽首維
皇神武聖謨斷自天康時兆庶

右勞率之曲十六句

武功既昭丕隆德化為隆德第十一

皇統御政化明威服德懷洽萬邦傾誠來歸筐篚相望蠢彼殘孽
性豺狼獨反側靡常窺間伺隙為寇攘皇震怒神武揚天戈振一
掃澄清蕩蕩寰宇如砥平橐弓戢矢韜五兵尚飭於邊防嚴禦備
式永寧坐黼展弘化綱煥禮樂齊虞唐

右隆德之曲二十二句

海宇泰和天下忻戴咸祝聖明萬萬歲壽為聖壽第十二
皇震威皇仁宣溥四表需八埏日月所照臨雨露無私偏咸足飽
與溫禮讓弗愆泰和世堯舜恩國家隆盛海宇安天子御丹宸萬
億年福廣大齊乾坤

右聖壽之曲十六句

飛泉操

宋濂

浦陽玄麓山有飛泉濂與鄭原先生數觀之造飛泉操鼓之琴書
諸崖石其辭曰
飛泉兮瀏瀏洗耳固非兮誰飲我牛覆謂我污兮移彼上流具人
之形兮奈何忘人之憂

思沂操

胡翰

曾氏有居越者睠焉不忘曾之舊鄉予以聖賢之道不下帶而道
存也作思沂操以廣其志云
沂之水兮泱泱曷不歸兮以浣我裳我思兮孔長沂之水兮湜湜

曷不歸兮以沐我德我思兮心惻沂可思兮亦可泝予鼓而舞兮
喟吾之與兮

風雷引

烈烈兮轟轟為颺兮為霆迅發兮震驚薄太虛兮下上聲謂天儕
兮孔仁孰司柄兮赫厥靈民無愕兮載寧威既揚兮沛澤零

在陳操

劉基

彼山有陽兮彼隰有樹彼路斯何兮孔棘且阻玄雲杳冥兮不日
以雨重華寂寥兮誰與晤語茫茫九州兮孰為予所龜蒙無人兮

駕予歸處

皇天操

春秋時晉大夫有從事於外而不得養其母者作

王禕

皇天至仁冒下土兮林林總總各獲其所兮我獨何為不得以養
其母兮育我鞠我亦已太苦兮養之弗時我何為者兮自我徂征
離此膝下兮有食孰以食疾痛其孰摩撫兮我之念母心焉如縷

兮母之念子亦豈寧處皇天之毒我其終我祐兮

江漢操

戰國時楚臣有忠其君而被竄逐者作

江漢滔滔日注於東只豈惟江漢百川朝宗只臣之事君所盡者
忠只臣忠之盡見謂為狂只我君聖明如日正中只豈弗臣察其
或未遑只抑臣實有罪盍反諸躬只自今以往矢益竭衷只臣雖
身遠臣心上通只臣心之通君終臣容只謂臣不信江漢其同只

廣琴操

朱右

操者操也君子操守有常雖窮阨猶不失其操也其音節固古詩
騷辭之體然詩以興騷以怨操以操作廣琴操廣云者題義因草
子之舊也

將歸操

孔子之趙聞殺鳴犢作

河之深兮誰將厲之河之淺兮誰將揭之河洋洋兮不我濟之竭
澤以漁兮蛟龍辟之覆巢殀胎兮鳳皇去之夫人有知兮予實類
之九州博大兮將予遂之

猗蘭操 孔子傷不逢時作

習習谷風以陰以雨巖穴幽阻誰其晤語猗蘭之芳燿燿其光不

我佩服昊天孔明子如好修維我之求子如不好於我何郵

龜山操 孔子以季桓子受女樂諫不從望龜山而作

維龜有山造初鴻濛自龜之東淮夷來從膏澤既施草木實多周

公上天柰龜山何

越裳操 周公作

天之聰兮曠曠其音天之明兮窅窅其深天之仁兮實臨下民文

王在上兮於穆不已浩浩其天兮時暘時雨越裳來臣兮萬物斯

覩

美之陰兮杲杲之室兮幽幽嗟室之人兮為死為囚匪維伊憊

兮實我之郵日月有明兮容光弗留

岐山操 周公為文王作

自郇有家於夏之先克承弗怠瓜瓞綿綿開我郇宇衍我宗禋嗟

狄之人敢乘以好彼咀矣岐將遂於遷既有我土母戕我民

履霜操 尹伯奇無罪為後母譖而見逐自傷作

驅車驅車車行無遲兒在中野父寧不悲驅車驅車車行無違兒

當有母孰使兒飢天生眾民罔不同仁風雨霜露實活我人民生

有知以順天賦

雉朝飛操 牧犢子七十無妻見雉雙飛感之而作

雉于飛山之陞孤雄啄羣雌隨雉于飛音下上陰陽和鳴聲暢胡

我人朝出薪入無家徂歲年

別鵠操 商陵穆子娶妻五年無子父母欲其改娶其妻聞

之中夜悲嘯穆子感之而作

黃鵠雙飛朝隨暮歸山川悠邈不女乖離今當乖違且復徘徊女

啄女飲母使女悲

殘形操 曾子夢見一狸不見其首作

明文在卷五
狸維獸不見其首我夢之形吉凶曷究式協於占載觀其繇曰修爾躬自天之佑

明文在卷五

明文在卷六目錄

古詩

視學詩

騶虞詩

平安南詩

胡廣

梁潛

楊士奇

明文在卷六

常熟薛熙纂
平湖郭襄圖訂

古詩

視學詩

胡廣

皇帝即位之初載夙夜延訪羣臣博詢治道從容燕暇召三儒臣
於前而諭之曰使天下人人崇尚儒術其道何由成頓首惶懼不
敢言明日又問訖無敢以對上曰必使天下人人崇尚儒術其機
在上於是咸稽首曰誠如陛下所言至是求賢之詔屢下凡巖穴
幽潛之士占一技能者即禮聘至闕下親承顧問命之以職而優
待之故四海之內罔有遺才焉明年策多士於廷簡其尤者十
八人俾究極羣書期其至於古人一切政事不以干之恆祿之外
復有他賜鼓舞作興之道至矣天下之士聞風而歆慕者皆奮躍
於下有菁莪棫樸之盛乃永樂四年二月朔勅羣臣曰孔子萬世

帝王之師其道之在天下載於六經天下不可一日無生民生民不可一日無孔子之道朕將臨國學躬禮孔子以稱尊崇之典所司其差吉日行之於是有司差以三月朔日辛卯是日昧爽上備法駕謁廟行舍菜禮先是命禮官考謁廟儀禮官奏宋服袍鞞行再拜上曰見先師禮寧過厚至上服皮弁行四拜禮畢駕幸太學授經祭酒臣儼司業臣智賜之坐講文武三品以上及翰林儒臣皆賜坐聽講講畢賜茗飲降玉音難問勉飭衣冠之士及四夷之人闕太學而觀者以億萬計視東京永平無足言矣明日臣儼臣智率六堂儒生上表謝錫賚有差大宴羣臣於奉天門莫不懽忻踴躍以為自古帝王崇尚儒術未有若此之盛臣仰見太祖高皇帝告成武功大興文教臨幸太學親講經書與諸儒難疑答問終日弗倦今伏遇皇上尊信儒術躬率舊典有光前烈揆諸古昔誠無與比故盛治之風薄極海宇凡四方僻遠非一譯所能通者遣一介之士持咫尺之書以諭之莫不奔走順服頓顙闕庭夫

豈威力所能強是皆文教躬行之效也臣維孔子之道與天地相為終始其在於人心者昭晰不泯當聖人在上天下文明則其道大行皇上全聖智之德居至尊之位恢弘治教表章孔子之道如日麗天中四海之民皆仰見之俾知所趨向皇上作興人心推明世教誠有以度越千古非近代帝王所能及也臣廣猥以菲才幸依日月之光獲覩文明之盛職在紀載不敢以默謹述為古詩一章以獻以播盛美於無窮焉詩曰

維古聖神繼天立極爰修教化以彰明德曰堯舜禹所傳一心無間顯微爰有古今學校之政教化先務三綱以正九疇攸敘周綱解紐正路日堙不有至聖孰宣人文大哉孔子道高德厚出類拔萃生民未有祖述憲章乃欲無言賢於堯舜事功則然教化無窮如天垂象六經昭晰萬世尊仰至治之要一本於茲生民永賴帝王實師於皇太祖受天明命道侔天地卓冠前聖武功爰定文教首崇表章絕學大闡休風載新庠序甄陶士類親臨璧雍以嚴祀

事躬御講筵觀者如雲衣冠萬國集於橋門猗歟盛哉亘古莫比
為憲萬世式承無已皇帝纘承舊章是遵緝熙聖學弗懈益勤季
春初吉躬視廟學舍奠先師秉虔有恪袞服大圭星弁煌煌穆穆
清廟濟濟裸將載臨講席列侍羣儒紬繹問難六經羣書聖道顯
明聖心以喜章甫逢掖踰舞士子圍瞻萬億華夏蠻貊左衽雕題
亦皆夷懌治有先後教有本源仁義之訓彌久彌敦於昭聖皇適
駿有赫洪化維神無思不服

騶虞詩

梁潛

臣聞自古聖帝明王至治之極必有禎祥若麒麟鳳皇醴泉甘露
應時而產皆所以符聖徵彰至德者也乃永樂二年秋八月皇帝
冢弟周王暉於鈞州厥有異獸白質黑章猊首虎軀其狀孔威不
可迫視王俾部曲俟之其性孔仁遂擾致之以詢之故老蓋古所
謂騶虞者此其是已夫惟人君有至信之德則見於是九月丁未
王率厥屬表獻闕下皇帝服皮弁服御奉天殿以觀不震不動柔

伏自然皇帝若曰厥為嘉瑞予罔敢知維致自昆弟之邦予其嘉
焉於是太子太師洪國公臣邱福謹率百官上千萬歲壽既而京
師人士忻喜聚觀咸以為聞自古昔見始今茲臣潛伏覩盛典不
敢自默退而考之騶虞詠於詩記於禮列於傳紀或以為義獸或
曰仁獸或曰聖獸至以為嘉祥者則其言皆同也傳曰國家將興
必有禎祥洪惟皇上紹登大寶率由舊章親親而仁民恩沛而義
洽萬方咸和以及乎庶類黍同穎於郊蠶成繭於野文犀白象諸
福之物抑之而愈臻卻之而復至何其盛也豈非上天以是昭至
德哉臣潛忝職記注苟不形之歌詠以垂示無窮輒為不職謹百
拜稽首而獻詩曰

於穆聖皇綏懷兆民端本自家篤於周親恩沛義洽如煦春陽至
和冲融發為禎祥禎祥伊何厥惟騶虞產於王國惟皇德符王馴
致之獻於帝庭素質立章雲舒霧凝帝乃觀焉載載其爪爰言究
之踐匪生草吁嗟騶虞外何其威內何其仁匪苞而鳳匪角而麟

吁嗟騶虞曷爲來哉王拜稽首皇則召之皇之仁民淪膚洽肌弘
暢旁達物以不疵皇之孝友本乎至性萬邦咸懷物以類應皇帝
曰俞惟王信恭王乃麟趾奚必騶虞皇帝曰吁凡百在位唯德召
和匪物其瑞庶臣拜手皇帝萬壽慶祥畢臻德音是懋

平安南詩

楊士奇

臣聞天以風雨霜露育成萬物聖人以禮樂征伐綏輯天下一出
於至仁周之文武皆一怒以安其民故雖聖人不志用兵亦不去
兵以爲治洪惟我國家肇興太祖聖神文武欽明啟運峻德成功
統天大孝高皇帝深仁大義順天應人平靖四方以教以育罔有
孽害時謂泰和至於皇上益廣仁義禮樂之化海內甸安四夷嚮
慕小大遐邇熙熙同春唯是安南其王辱微其賊臣黎季犛暨其
子蒼沿襲悖兇屢弑國主淫刑暴斂毒虐下人滋久茲甚皇上閔
焉弗寧發詔使諭使遷悔賊罔忌畏數侵掠厥隣占城又寇我思
明祿州寧遠之地在廷之臣咸請發兵討罪上曰彼匪人乎斯不

可終化發詔使申諭焉賊聞其主有遺腹子奔來京師卽上表謝
過請還之上曰彼其庶幾有悔乎遣使者衛送出境賊伏眾邀遏
使者執殺其主遺腹子事聞皇上震怒召文武羣臣議曰予承天
命保康兆億民一民弗獲惟予弗恭人有弗迪而遽誅斯曷抑厥
自新乃有弗迪至於再三而釋弗誅惟予弗君今盜滋弗迪予必
不釋將往大正匪子志用武惟盜滋稔惡羣臣合辭力贊必決乃
告祀天地宗廟及天下山川命征虜將軍左右副將軍左右參將
暨神機橫海驃騎遊擊鷹揚五將軍率師討賊師發金川門上臨
江送之諭之曰汝其代予往行天討惟盜暨厥子必誅弗釋暨同
惡必誅弗釋凡厥脅從咸釋弗誅惟茲安南咸朕所統厥民滋困
於盜罔攸訴告汝其代予往弔罔有侵害或有侵害卽旣殄戮盜
猶底汝罰旣殄戮盜其咨求其王遺嗣子俾統治厥民往哉惟懋
師入安南黎賊脅驅其民號百萬拒於境上民聞王師來爲已除
害皆倒戈迓降師渡富良江入其東都城又入其西都城如蹈無

人之地賊窮迫盡棄其眾獨與其孥數人並遁海去王師追之悉
生繫之不遺一人乃縱所脅從容民所苦罷其苛禁敷求安南王
遺嗣民既罔有侵害又蒙哀矜弔恤悉解去所苦咸竊喜曰我幸
復見今日幸聖天子不遐棄我萬里外而復生我欣然如脫虎口
歸慈父母相率跪軍門言曰惟故安南王遺嗣悉殲於寇暴無遺
惟茲土故隸中國誠願復列中國氓密比聖化俾我暨我子我孫
咸免於夷狄蠻貊軍中獻所獲俘且具言民所欲皇上重違民意
下詔郡縣其地選置守吏復置交阯布政司總之在廷文武羣臣
上表稱賀臣惟安南本漢南越地武帝置交阯郡暨五季丁氏竊
據之始僭稱王宋弗能制因授之卒循爲常更歷數姓蟠結深固
屢叛弗服宋元數舉兵誅訖無成功皇明奄有四海率先款服曾
不踰世終梗寇盜天地之德務隆包荒累誨弗悛肆急援溺仁義
之旅弔伐並行恩威所臨有迎無拒累月之頃肅清兇慝大拯塗
炭弘復疆土功德俊茂振古無倫焉惟古帝王施德建功皆有頌

歌傳播後世臣忝列從臣後輒擬古作者之意譔平安南詩一首
以示後來謹拜手稽首上進詩曰

維天生民咸俾遂適有攸弗及肆命有德惟德格天爲君爲師以
教以治俾適咸宜天啟皇明悉昇所覆明明太祖生育教誘衣之
食之邇安遠歸禮昭義布長幼尊卑皇帝繼統四方萬國益富而
教和豫安適蕞爾蠻交醜孽其間爲狼爲豺小大畢殘皇曰彼醜
匪異人類庶或改率予其化誨言諄諄弗遷益驕戕暴厥鄰盜
我邊郊百辟文武頽伏陛言弗時翦屠將俾蔓延皇曰申誨猶或
改率弗改弗率跳梁狂獍僞蒸顛命賊我使人暨彼遺孽磔身百
分皇曰彼醜獸心靡易螟螣弗除曷遺嘉稷惟皇上帝付予八埏
有溺弗援予滋違天誕命將臣暨旅師徒往勵汝勇往宣汝謨咸
弔困窮殲惟醜虜職敷予仁匪曰究武六師邁邁辭直氣厲涉危
蹈深若履平地暉暉烈烈赫赫業業如飄剝剝如霆截截蠢彼醜
虜脅驅爲拒仁威天降孰有強禦雞翎夜闢富良爲帶投兵委戈

明文在卷六
奔降迓拜乃入交城乃走兇渠繫之海隅如探取雛乃咨脅從悉
解而縱乃視交人弔其族痛交人頓頓爰始色溫舒其兢兢爰始
笑言交人有言我困荼毒天子生我旋痲爲福交人有言我初匪
夷逃遠淪汙陷茲塗泥天子聖仁曷還我初內我庇我永康不虞
俘獻於廷天子受之民有願欲天子予之四夷有聞歡喜告語天
子聖仁我有父母救民之疾不以遐僻有梗弗率必誅不釋天子
聖仁孔武且神孰其爲梗鑿彼交人芒芒四裔威服德拊巍巍中
夏尊安鞏固海航陸車來享來庭千萬億年拱我皇明

明文在卷六

明文在卷七目錄

古詩

童 冀六首

韓 弈一首

宋 濂一首

錢 宰八首

楊 基一首

謝應芳一首

明文在卷七

常熟 薛熙纂
南海 梁佩蘭訂

古詩

效陶彭澤

童冀

少無簪組念雅志在邱岑結廬古澗阿棲迹嘉樹林南軒納朝陽
北牖延夕陰踵門無深轍入室有鳴琴良朋以時至清坐談古今
秫田秋向熟濁醪行可斟頃筐擷園蔬持竿釣清潄歡飲聊共適
過滿非所欽

擬古五首

童冀

生世無百年孰究天地終寧知洛邑地乃處陸渾戎古來遺世士
守雌知其雄我生七九年始識廣莫風朔土恆早寒況乃歲律窮
發春諒不遠行見星鳥中
月落窗牖白日出東南隅披衣茅簷下稍覺四體舒故山邈千里

目文在卷十
永念先人廬晨夕庇風雨少小之所居別去踰十年豈但園田蕪齒髮日衰暮天意諒何如

西京全盛時金城高且完十二羅通衢四方萃衣冠金張貴公子錦衣照朱顏甲第連雲霄車馬塞城關雞鳴趨青瑣日晏下朝端瑤樓啓華宴瑤瑟發清彈吳娃引趙女妙舞翔鳳鸞亦知衡門下士不免飢寒

美玉韞荆璞三獻泣卞和甯戚扣牛角中夜猶商歌古來不遇士蹭蹬良亦多百年水上漚萬事風中花且復對尊酒不飲當如何下士困形役至人得天游尸居一室間心已歷九州所以驅牛翁不肯飲下流翩翩九苞鳳飲啄崑崙邱一飛下虞廷再鳴止岐周瑞物不世出安用羅網求

擬行行重行行

錢 宰

出門萬里別行行遠防邊相望各天末北斗日夜躔四運秋復春不見君子還燕車北其轍越馬南其轅目遠心愈近悵望徒懸懸

黃雲暗關塞路險不見天式微夫如何日月忽已遷願言崇明德無爲終棄捐

擬西北有高樓

錢 宰

高臺何巍巍參差與雲平玉繩臨雙闕長河流無聲上有羽衣人逍遙吹玉笙清響涵明月飛佩何泠泠借問弄者誰疑是董雙成逸思隨風發無人識其聲曲終再三歎感慨有餘情所悲同門友局促趨世榮願將秋水劍爲之解塵纓笑呼雙黃鵠與子俱遠征

擬涉江采芙蓉

錢 宰

涉海采琅玕紅者珊瑚枝明珠盈懷袖將以遺所思海闊不得返所寶莫致之爛其納我室抱璞將何爲

擬明月皎夜光

錢 宰

皎皎明月光照我屋東頭寒螿鳴樹間招搖指孟秋白露下高梧落葉聲颼颼寒温更變遷河漢東南流懷哉里中兒奮志起遠遊飄然遡長風乘槎犯斗牛支機織女石爲問今在不水深波濤闊

浮名將焉求

擬冉冉孤生竹

錢宰

青青梧桐樹託根在高岡與子新合歡翁如鳳與皇鳳皇鳴鏘鏘
合歡期世昌歡情一何短離思一何長嗟彼籬下菊含英揚其芳
晨霜秉貞節寧隨秋草黃終當採而佩歲晏夫何傷

擬庭中有奇樹

錢宰

中林多幽蘭江籬雜芳蓀采之酌春酒將以清心魂持杯未及飲
悵然念王孫王孫不歸來置酒在芳尊

擬迢迢牽牛星

錢宰

河東有織女皎皎雲為章手弄機上絲日夕更七襄織成五色文
欲製君子裳莫言隔秋水可以駕飛梁睨彼牽牛星終日不服箱

擬客從遠方來

錢宰

故人萬里別海水日夜深南風海上來遺我雙南金不見故人面
乃見故人心鑄作黃金微置之白玉琴彈為別鶴操間以懷湘吟

曲終聽者稀矯首望知音

新歲述懷

韓弈

白首坐中堂屠蘇最後嘗行年六十一非短亦非長眼昏字尙見
脚軟策能將寒有衣加體飢有食充腸閒無官職係貧無私債償
懶惟居寢室健或到僧房即死已多幸且活亦無妨

季迪病目醫令止酒因作此勸之

楊基

病目須飲酒飲酒調微痾氣血鬱不舒賴此酒力和所以雷公方
製藥用酒多活血必酒洗散鬱須酒磨製藥既用酒飲酒良非他
酒可引經絡酒能驅病魔病目不飲酒此蓋醫者譎李白好痛飲
不聞目有瘞子夏與邱明不為飲酒過飲酒既無害不飲如俗何
清晨呼東家買置數斗醯爛醉瞑目坐滿目春風醜陶然物我忘
夢見孔與軻此藥豈不佳而乃止酒那我今勸君飲君意無媿媿
庸醫或見責請示眉庵歌

送希直歸寧海五十四韻

宋濂

洪武丙辰予官禁林寧海方生希直以文爲贄一覽輒可之館賓
左右與其譚經歷三時乃去明年丁巳予蒙恩謝事還浦陽生復
執經來侍喜動於中凡理學淵源之統人物絕續之紀盛衰幾微
之載名物度數之變無不肆言之離析於一絲而會歸於大通生
精敏絕倫每粗發其端卽能逆推而底於極本末兼舉細大弗遺
見於論著文義森蔚千變萬態不主故常而辭意濯然常新衰
滔滔未始有竭也細占其進修之功日有異而月不同僅越四春
秋而已英發光著如斯使後四春秋則其所至又不知爲何如以
近代言之歐陽少師蘇長公輩姑置未論自餘諸子與之角逐於
文藝之場不識孰爲後孰爲先也今爲此說人必疑予之過情後
二十餘年當信其爲知言而許生者非過也雖然予之所許生者
寧獨文哉庚申之秋生以不見大母者久將歸省焉予深惜其去
爲賦是詩旣揚其素有之善而復勗以遠大之業云
昔在詞垣時英才常駿奔水碧與金膏價重駭見聞終然無根蒂

斂散空中雲方生海上來玉立而春溫袖攜絺繡書面帶黼黻文
揖遜入禮域陳義凌秋旻同餐太倉粟共勘典與墳潛深索幽邃
穹高攀嶙峋踏雪忽言別涉險航江津梅花似相憐沿途憫孤貧
湛恩來九天憫我髮如銀特敕還故山許與煙霞親生聞抱經來
處此寂寞濱滢蒼扣無始溟滓窮無垠宇宙所管攝載籍所敷陳
終始鉤鉗之若大樂建鈞律呂按高下宮商肅君臣鬯和免恣憊
疊奏歸繹純桑濮唉麾斥淫哇竟何存黃鍾壓瓦釜庭燎滅鬼燐
似茲稽古力可定拔幟動濡毫寫雄顛勢足移峨岷漏泄渾沌竅
出入造化神變幻波起伏清溫玉璘珣盡抽神奇秘不墮臭腐塵
所以日出之愈見光景新山鬼當灑泣湘靈且逡巡振古著作家
後先各繽紛豈知萬毛牛難媿一角麟古今二千載有如星在晨
豈意瓦礫中見此席上珍予生髮未燥立言鄙河汾結交一世士
暮齒越七旬妍媸與苦良入目無留痕自非病狂藥顛倒甲與種
寧因一學徒諛辭浪云云大言心不作祇爲所見真生今省行期

序飲松竹根笑摘黃金花起泛青瑤尊酒酣兩耳熱劇論如抽繯
寧無贈別言有志須當遵真儒在用世毋徒滯彌文文繁必喪質
適中迺彬彬有虞號多士九官展經綸惟時亮天工外夷悉來賓
不聞有著書鼓蕩摩乾坤生乃周容刀生乃魯璵璠道真器乃貴
奚須用空言孳孳務踐形勿負七尺身敬義以為衣忠信以為冠
慈仁以為佩廉知以為鑿特立峴千古萬象昭無昏此意竟誰知
為爾言諄諄毋徒謂強聒一一宜書紳

簡張希尹

謝應芳

子生寡諧俗老去得知已論交固云晚莫逆良可喜聯翩諸侯客
寂莫著書事夜分青藜光日並烏皮几幾回論班馬一笑易亥豕
煙雲揮灑外風月吟嘯裏蚶杯酌流霞獸爨沈水佳哉水調詞
清我塵俗耳朱弦聽者希白雪和能幾別來懷盍簪夢見承倒屣
帷林大江邊瓢巷橫山趾秋風響梧葉甘雨熟菰米相望不三舍
相過堪一葦詩筒繼元白通家猶孔李況於阿戎談亦與諸任齒

尚友古之人厥德薰晉鄙

明文在卷七

明文在卷七

王

明文在卷八目錄

古詩

袁介一首
王行一首
史遷一首
胡儼一首

顧祿一首
張適一首
孫蕡一首

明文在卷八目錄

一

明文在卷八

常熟 薛熙纂
同里 陳如鑿訂

古詩

檢田行

袁介

有一老翁如病起破衲縑瘦如鬼曉來扶向官道旁哀告行人
乞錢米時予奉檄離江城邂逅一見憐其貧倒囊贈與五升米試
問何故為窮民老翁答言聽我語我是東鄉李福五我家無本為
經商只種官田三十畝延祐七年三月初賣衣買得犁與鋤朝耕
暮耘受辛苦要還私債輸官租誰知六月至七月雨水絕無潮又
竭欲求一點半點水卻比農夫眼中血滔滔黃浦如溝渠農家爭
水如爭珠數車相接接不到稻田一旦成沙塗官司八月受災狀
我恐徵糧喫官棒相隨鄰里去告災十石官糧望全放當年隔岸
分吉凶高田盡荒低田豐縣官不見高田旱將謂亦與低田同文

明文在卷八

字下鄉如火速逼我將田都首伏只因嗔我不肯首卻把我田批
作熟太平九月開早倉主首貧乏無可償男名阿孫女阿惜逼我
嫁賣賠官糧阿孫賣與運糧戶即日不知在何處可憐阿惜猶未
笄嫁向湖州山裏去我今年已七十奇飢無口食寒無衣東求西
乞度殘喘無因早向黃泉歸旋言旋拭腮邊淚我忽驚慚汗沾背
老翁老翁勿復言我是今年檢田吏

題桶底仙山圖

顧祿

昔人夜投逆旅中戲將指爪呈神工颺颺逸響如飄風桶底刻出
蓬萊宮狀如六鼇擁虛空戴山出沒滄溟東瓊臺瑤闕知幾重千
門萬戶遙相通儼然中坐一老翁星眸霞臉冰雪容羣真左右來
相從或翳白鳳騎青龍女仙七十如花紅各執樂器笙與鏞鈞天
一曲奏未終雙成勸酒琉璃鍾谷神長生壽無窮出入造化超鴻
濛我欲上天躡紫虹高步去逐東王公

滕用亨諸篆體歌

王行

維周大篆成史籀宣聖傳經製蚪蚪總因倉頡見鳥跡象形置書
變來久李斯小篆類玉筋鍾鼎魚蟲分眾手碧霄鸞鳳漫迴翔滄
海蛟螭互蟠紐有如垂露楊柳葉或似委薤劍環首許慎程邈評
已彰餘子紛紛亦何有有唐陽冰號高古嘗揚鴻都嶧山譜新泉
丹井尚幸存纓絡麒麟折釵股刻符摹印氣候形義理深關非小
補南陽髯翁學古書雅與秦漢參錙銖古文奇字盪胸臆豈若俗
工譌魯魚自言初習勝國時玉雪左丞吾所師荻莖錐沙指畫腹
廿年勤苦求妍姿嗚呼方今世雍熙明良際遇千載期大書功德
勒金石絕勝草草人間碑

題趙原臨高尙書山水小幀

張適

有元畫山誰第一燕都獨數高尙書盛名不在吳興下米虎用墨
渾無殊江南趙原最晚出蓄得高宰留真跡行披坐閱無慙停肯
綮皆將飽胸臆貌此小幀雲山圖萬里不盡墨模糊綠樹人家春
晝晚當門縹緲風煙湖儼與前朝合作符何啻禊帖唐鉤模黃庭

畫贊雖小字位置春容大無異平原一變為穹碑任筆縱橫亦適
意趙卿得此變化筆知爾當今盡無敵酒酣試倒金壺汁元氣淋
漓鬼神泣趙卿趙卿誠莫當我有古紙久矣藏幾時邀君吸百觴
為我乘興揮毫芒使人復覩尚書郎高堂素壁生輝光

題山水障子為蕭溪畊者賦

張適

蕭溪先生樂山者結屋臨溪頗幽雅開軒見水不見山卻向圖中
看揮灑高齋素筆懸清風彷彿坐我林崖下羣峰奔馳勢如馬綠
樹人家面平野層閣忽從天際來飛泉遠自峯頭瀉半山雲氣干
峯白滿谷霞生萬巖赭野橋日落行人稀幽徑花開知者寡蕭溪
閒居晝多暇坐對此圖看不捨平生況復能食力春作鋤犁躬自
把短蓑朝畊隴上雲長縈夜落書邊爓有時歸來面盟鷗鯨吸春
醅知幾舉登高或著謝傅屐帶酒何妨遠公社臨池每解學來禽
對客猶知論裹鮓醉中邀我賦長篇老我才疏不堪寫

茵子詩追和楊廷秀韻

史遷

松花岡頭雷雨急坡陀流膏漬香汁新泥日蒸氣深入穿苔破蘚
釘戢戢如蓋如芝萬玉立紫黃百餘紅間十燕支微勻滑更濕傾
筐盛之行且拾天隨杞菊謾苦澀采歸芼之脫巾笠桑鷺楮雞皆
不及嫫姑天花當拱揖鹽豉作羹炊玉粒先生飽飯踏曉日更遣
樵青行負笈

南京行

孫蕢

南京自古說英雄遠勝秦中與洛中吳越千山高拱北巴江一道
遠朝東秦淮水入丹陽郭北固城連六代宮岌嶮石頭如踞虎透
迤鍾岳似盤龍樓閣天中起萬戶千門霄漢裏太乙句陳紫
極通翔鸞舞鶴珠峯峙卻日觚稜駕寥廓行空複道侵箕尾仙掌
銅盤玉作流靈芝華蓋霞為綺華蓋靈芝粲綺霞御橋金水正當
衙五門彩旭朝天仗馳道香風散日華細柳千章爭拂地嬌鶯百
轉競啼花紫電龍光飛武庫雕甍甲第列侯家侯家卿相真才彥
玉筍蟬聯奉天殿屈宋摛文入石渠韓黥耀武專方面黃閣承恩

宣雨露烏臺執法行霜霰環珮聲清散早朝葡萄酒綠沾春宴春
宴春風坐百花歸來里巷鬪香車金張富貴人爭羨王謝風流世
共誇隱約商筇隨赤羽葳蕤大纛映彤牙盤陀寶校光前導組絡
鳴鑣隘狹斜狹斜西下通三市紫霧紅塵拂天起南陌東廂馬似
龍烏衣朱雀人如蟻爭看買珠輕薄兒亦訝探丸游俠子猶懷鳳
臺醉李白無復新亭泣周顛井傍美人悲麗華道上行談結綺
結綺臨春總可憐龍河一帶但寒煙天界叢林開象魏冶亭高閣
豔神仙神仙盡是蓬瀛侶更畫秦臺玉簫女渺渺青鸞月下來飄
飄彩鳳雲中舉別有青樓大道旁煙花萬樹儼成行飛瓊裊裊翠
羅袖小玉峨峨紅粉妝小玉飛瓊兩少年清歌妙舞鬪嬌妍舞態
盤迴芳樹底歌喉宛轉落花前彩雲作雨朝朝合璧月流光夜夜
圓朝朝暮暮長如此秋月春花若流水去歲今年景不如南來北
去人相似生綠羅屏遮上客流蘇帳煥邀公子爛漫三春錦繡城
空濛一片笙歌市繁華佳麗樂無邊我獨胡爲困一塵已似楊雄

棲白屋還如司馬臥文園誰將積業三千牘換取揚州十萬纏桃
李風前歌扇底看花騎馬過年年

驪山舊妓行

孫賁

秋風楊柳凋金縷冷露芙蓉落芳渚寒香晚色何所如驪山唐姬
教坊女蛾眉淡掃山遠碧蟬鬢半拋雲亂吐時妝無復新妖嬈曩
態猶存舊嬌嫵我昨咸陽縱冶遊冶遊爛漫遍西州青山直抵雙
龍闕綠水橫過五鳳樓南國佳人金錯落長安公子玉驂騮銀壺
送酒青絲絡皓齒當筵白雪謳琵琶橫笛空聒耳唐姬搗箏妙無
比清彈一曲久含羞呼喚百迴纔強起移柱相參雁成列調弦未
就人先喜俛首斜拖珠步搖向人高露春纖指樓高韻發響泠泠
急管悲歌一霎停初聽乍如風雨至再彈還作鳳皇鳴清如玉女
鈞天奏壯似雕戈出塞聲澗水帶冰時哽咽春雷震石忽憑陵憑
陵未已旋清悄悄漸凝聲漸小四座無言俱寂寥餘音已斷猶
縈繞溶溶宛宛復悠悠切切淒淒還窈窈深閨斷蚓怨寒宵淺谷

嬌鶯破春曉纏絲萬恨與千愁婉意柔情不肯休蔡琰胡笳悲紫
塞班姬團扇掩清秋樓前皓月明如練天外行雲凝不流促拍未
終南內曲新腔忽過小梁州梁州一摺月向午唐姬此時心獨苦
銀甲悲深不忍彈衷腸斷盡無由語低籠翠袖搵香淚醜使歡娛
變淒楚訴盡平生富與貧可憐人世今成古憶昔開元正太平兒
家生長在天京十三學舞曾驚座十四搗箏能擅名玉貌羞花長
窈窕宮腰怯柳更輕盈春寒不離鴛鴦枕日晏方開孔雀屏五陵
年少秦川客爭愛兒家好顏色滯雨尤雲最惱人追歡買笑寧論
直聲名每出流輩上風致獨覺旁人惜承恩況得登掖庭宛轉隨
龍侍君側海晏河清久息兵四夷賓貢盡充庭炎方已見來丹荔
交趾還聞進雪鸚耀日香車連紫陌飛雲畫棟列朱甍空濛一片
笙歌海浩蕩三春錦繡城驪山山上多樓閣萬戶千門通碧落大
駕深居在九重四時多暇惟行樂已營連昌勝結綺復起芳鳳齊
花萼壺飛玉女遞更籌舟戲金龍動鱗角侍臣傳敕選嬌容特許

兒家步輦從宮扇影移花雨外山呼聲沸錦雲中千株火樹爭明
月萬炬金蓮鬪彩虹子夜歌詞翻白雪霓裳舞隊散旋風歌停舞
歇徘徊久銀箏獨進纖纖手明眸麗質一當前含顰美人俱在後
數聲清響動絃索八面涼風生戶牖豔曲新裁萼綠華中官催賜
葡萄酒年年秋月復春花多在宮中少在家嬌笑不愁宮監怒豔
妝長得阿姨誇朝遊復道瞻天表夜步西廂拜月牙鬪草經春陪
號國藏鬪竟夕伴昭華韶光忽逐流年轉野鹿銜花上林苑鐵騎
東來鳳闕空金根西狩蛾眉遠上方無復聽宣詔新籍寧辭避差
遣約臂金環雨雪寬凌波錦襪風埃蹇星移物換得無情復向驪
山悄地行紫禁無人芳草合瑤階雨過綠苔生歌臺索莫花千樹
舞榭蒼涼月半櫺繡閣秋陰連瑣闥銅仙清淚落金莖高梧隕翠
蓮飄玉太乙句陳看不足百子樓寒霧影昏長生殿古煙光綠宮
牆瓦落見蒿萊輦路塵生走麋鹿舞馬雕牀惱夢思花奴羯鼓驚
心目故宅新人作宴遊內家紅錦列纏頭珠簾繡柱俄成夢鳳管

明文正卷八
龍笙總是愁舊曲聞來眉自斂盛年說著口應羞飛蓬短鬢何曾
白老屋疏茅不奈秋舞衫長借鄰人著同伴相呼只推卻臉玉香
隨翠靨消淚珠暗逐燈花落憂來倒插黃金鳳夢裏時彈白翎雀
百感中來不自由芳心一片從誰託唐姬言語一何長句句淒其
字字傷滿座聞之聲唧唧沾巾我亦爲浪浪滄桑轉瞬誰能識富
貴浮雲安可常覽鏡每聞悲素髮舉杯長欲勸流光唐姬亦莫懷
抱惡自古佳人多命薄傾城西子逐鴟夷絕代明妃嫁沙漠尊前
有酒且歡笑身外閒愁付冥漠皎月秋來幾度圓穠花春盡從渠
落唐姬攬涕復陳情請作驪山舊妓行桃李風前霜月下長吟亦
足慰平生不因水上琵琶語那識江州司馬名爲爾臨風歌一曲
百年哀怨起秦箏

續十二辰詩

胡儼

鼯鼠飲河河不乾牛女長年相見難赤手南山縛猛虎月中取兔
天漫漫驪龍有珠常不睡畫蛇添足適爲累老馬何曾有角生羝

羊觸藩徒忿憶莫笑楚人冠沐猴祝雞空自老林邱舞陽屠狗沛
中市平津牧豕海東頭

明文在卷八

明文在卷九目錄

古詩

葉見泰一首

謝應芳三首

吳斌一首

明文在卷九

常熟 薛 熙 纂
同里 馮 長武 訂

古詩

贈希直

葉見泰

吾友方濟寧其人世希生有如炎燉之雪曙天之星平生特立不
徇俗窮年矻矻惟究心乎義文周孔之遺經一旦起作郡卓然為
羣黎之怙恃列牧之儀刑九原長往不可作使人思之泫然雙涕
零我言濟寧今不死濟寧有子字希直外焉才華已絕世內焉持
敬恆惺惺往年我謁宋太史見之坐右愛其風神秀發目光如月
雙眉青太史文章擅中土東播踰若木西流入麓冷每稱希直稟
間氣旁馳餘子猶以清渭臨濁涇太史猶巨鐘而我猶寸莛我誦
蕪陋辭一一為我側耳聽只今遠行不可覲送入樊籠仍翦翎我
歸已五載俛首類拘囹每一念疇昔中心若生螟今年希直忽相

過使我灑淚如醉醒握手塵市中顧影兩矜嶢雄文細字塞巨帙
咄哉著述能爾馨振袂快讀不可了雅辭宏論開心局其顯遏雲
漢其幽通窈冥瞻如戈甲積晉庫奇如盤鼎鑄商銘麗如句芒青
春布花卉壯如隆豐白日驅雷霆千流萬派怒奔放終然帖帖超
東溟顧我斂退餘守口動如瓶今日得子文耽誦不暫停有如赤
日塗解渴得楚萍又如藜藿腸忽咀五侯鯖瑣瑣彼何人迺工月
露形劃然周廷覩巨燎光影不復窺微螢嗟哉希直執經太史門
聞禮濟寧庭以文比行行益峻持以用世不啻如養生之穀粟濟
疾之參苓胡乃僻處東海裔坐閱晦朔彫堯冀我欲其為不朽計
鈍蹕淬礪重發矟至音詎能秘錫鸞笞和鈴直須上追虞書媿周
雅豈肯下比秦誓方魯駟於以作春秋之羽翼為禮樂之藩屏嗟
哉載道器孰謂在世猶芻靈上帝閱世憫斯文寧復下取救六丁
水為江漢星作斗鐫之金石垂千齡

續催日鼓謠

吳斌

胡為乎六龍斜飛於若木之金天復沈淪於西溟瀕洞之重淵日
車摧頽勢將墮但聞驚天伐鼓砰轟喧闐恨無魯陽所揮之神戈
又無羲和所執之神鞭徒看光景入海去惟有雪山千疊春雷喧
日已溺誰能援似將宇宙入冥昧魑魅泣雨神啼煙煙雨暮何由
晨肆鬼怪愁天人有美二子超凡倫凝丹泣血驚蒼旻欲攀天上
萬丈之玉繩攬此波中咫尺之金輪力不及情難伸歌日鼓悲無
垠空有蛟龍之翰麟鸞之文照耀今古誠足珍心比衛精誰復陳
至今陰氣毒天地幾時六合迴陽春吾聞東方乃有扶桑之君賜
谷之神可以返日馭昇天門過黃道御紫宸安得迴光洞照下土
之盲人神君精感應相鄰忽爾金雞啼白東海天朱光飛射開幽
玄鼓聲驚倒三山巔白日曙青陽生出海嶼游天京四方咸觀曉
色清麟胎鳳釵含精英聖皇欽天建太平作韶武吟簫笙警若日
鼓騰天聲乾坤上下俱清寧億年萬世同光明

具區畊隱歌為盛徵士作

謝應芳

脫屣東華塵結廬太湖濱蓬蘞開小徑桑麻接比鄰金門玉堂夢
不到煙蓑雨笠情相親東風二月桃花雨布穀飛來向人語一犁
初破隴頭春黃犢出闌健如虎西山不知誰采薇南山不知誰采
芝我畊我田食我粟歲晚復有冰壺齋悲歌笑甯戚夜半猶未已
人間閒是非何用污牛耳綠陰繫牛春晝閒樵童隨我看青山日
莫歸來一壺酒牛棘花前開笑口笑問儂家子若孫知我犁鋤佳
趣否豈不見蘇秦爲無二頃田六印纍纍苦奔走到了落禍阮虛
名何足取鹿門龐真我友

和顧仲瑛金粟塚燕集

謝應芳

我昔過北邙立馬山之隈爲問隴頭樹皆云後人栽生前尊酒誰
不有無人到此自對青山開屋堆黃金五侯貴難免白骨生蒼苔
道旁多棄夜光璧爨下誰惜絲桐材玉山先生達觀者胸次不著
閒悲哀清秋攜客墳上飲翹車載酒山童推大笑胥魂乘白馬深
慚鯨魄化黃熊墓銘自製詩自輓視身不翅輕於埃鶴羣長繞嘉

樹舞龜趺並載穹碑來鸞翔鳳翥玉箸篆虎踞龍蟠金粟堆長吟
復短吟此興何悠哉秋風無情摧萬物芙蓉亦老胭脂腮笑言他
年翁仲共寂莫何如此時賓客相追陪功名本愁根富貴眞禍胎
百年能幾日一日能幾杯從茲秉燭長夜飲猶恐四蛇二鼠忙相
催主人沈醉客亦醉絕倒不顧旁人哈北望中州數千里人家盡
作兵前灰髑髏委荒郊孰辨賢與才伯夷空忍首陽餓屈原徒作
湘江纍神仙初無不死藥方士浪說尋蓬萊君不見無邊之海白
淼淼無名之山青巍巍長鯨噓吸成風雷徐市一去何曾迴

古鼎歌

并序

謝應芳

蘇州萬壽寺舊藏古銅鼎識者奇之其識有周康穆宮冊錫寶用
鄭伯姬等語大德中任陽謝氏嘗欲以玉杯易之時住山默翁師
不從後謝氏爲構佛殿乃予之至正丙申謝遭兵鼎因失去甲辰
夏四月愚隱智公復得於軍人之手耆舊聚觀皆曰我山中故物
也旣而出鼎見示并述其由索詩以紀之

碧雲師著金伽黎空王殿前龍象隨當階一卒送古鼎狀若獻寶
 波斯兒羣緇聚觀方丈室中有老僧前致詞云是山中舊時物立
 誦款識能無遺文詞詰屈錯盤詰字體隱伏蟠蛟螭蒼姬訖錄世
 屢改不知何代來於斯謝家寶樹修佛刹巨構買與秦城齊鼎兮
 鼎兮什襲去歲經六紀今來歸師聞此語重歎息兵火連年炎九
 域金鍾大鏞棄道旁總若沈沙銷折戟鼎歸禪月獨無恙護持信
 有天龍力摩挲兩鉉濕煙霧錯落丹砂映金碧光如摩尼含五色
 高比珊瑚長一尺嗚呼義軒之鼎莫可求禹鼎亦已淪東周世所
 用者非爾儔或膨豕腹徒包羞調羹爾無與覆餗爾不憂歸來兮
 歸來北山兮菟裘汾陰自有為時出切莫放光驚斗牛

明文在卷九

明文在卷九

三

明文在卷十目錄

律詩

張	鄭	唐	管	楊	王	王	錙	詹	王	汪	張	徐
適	韶	敏	訥	基	履	彝	崧	同	禕	廣	羽	賁
五	一	二	一	九	一	一	一	一	一	洋	九	四
首	首	首	首	首	首	首	首	首	首	二	首	首
沈	易	程	唐	袁	藍	孫	胡	魏	張	宋	張	以
周	恒	國	肅	凱	仁	作	翰	觀	寧	濂	以	寧
四	一	一	一	六	一	一	一	一	六	一	六	六
首	首	首	首	首	首	首	首	首	首	首	首	首

明文在卷十目錄

祝允明一首

文徵明一首

Blank page with faint vertical lines and ghosting of text from the reverse side.

明文在卷十

常熟薛熙纂
華亭董俞訂

律詩

尋春

張羽

朝來微雨罷何處可尋春
冰散池容動煙銷柳意新
穿林聽鶯遠度陌問花頻
但覺相逢處情親似故人

早春旅懷

張羽

遠客歸未得東風冷尚嚴
燒痕山頂禿春色柳眉尖
病久醫方熟貧深酒債添
浮生欲何以朝暮為齋鹽

約徐隱君幼文同隱吳興

張羽

吳興好山水子我盍遷居
繞郭羣峰列迴波一鏡如
蠶餘卽宜稼樵罷亦堪漁
結屋雲林下殘年共讀書

孫景翔幽居

張羽

厭踏輓紅塵閑居江上邨養魚寬鑿沼愛竹別移門月色侵書幌
山光入酒尊我慚行役擾猶未卜田園

山陰曉發寄暨陽舊友

張羽

水漲官河遠西風去棹輕四山猶暝色萬木盡秋聲村近聞雞犬
天寒憶弟兄故園歸未得漂泊若爲情

寫懷

張羽

心上無俗事禪餘只好吟命窮甘白屋身健直黃金世路劔關險
侯門滄海深虛名何必尙吾志在山林

次李景山韻

張羽

道人無可愛所嗜特清吟墨痕沁春雪燈影搖秋霖試將不龜手
用鼓無弦琴此意許誰會思君滄海深

秋夜旅懷

張羽

命與時相厄勞生空瘦形苦吟詩有債久病藥無靈夜雨和愁落
鄉山入夢青歸心逐孤雁飛過浙江亭

詩窮

張羽

道在何妨拙身安一任貧已知如意事不逐苦吟人瀑布空山月
梅花破屋春奚囊有佳句未肯寄朝紳

宿王判簿宅送徐孟岳

徐賁

來往頻吳越扁舟只載書言從交後淡情恐別時疎涼意蓮塘靜
宵光竹牖虛懸知待明發柝盡是愁初

秀野軒

徐賁

何處問幽尋軒居湖上林竹陰看坐釣苔迹想行吟嶂日斜明牖
渚風涼到琴相過有隣叟應只話閑心

黃山人家次韻荅陳秀才

徐賁

相逢坐上客俱是此鄉人重見兵前面能全竄後身月遲疑夜短
風乍覺寒新爲訴窮途事都忘語意頻

馮山人湖上別業

徐賁

宅近南湖口青山盡在門田卑嘗冒水鄰少不成村住久諳農事

耽閑悟道言如君避地者今有幾家存

夜直與架閣樂秉德期孫伯融不至

汪廣洋

雙立碧玉瓶對酌紫薇省長風吹翠梧初月下金井幽懷鬱未開
短髮醉慵整夜分羣籟沈窗虛燭花冷

月夜

汪廣洋

休撥紫檀槽且傾黃濁醪涼天兼得月我輩復持螯彭蠡一杯大
匡廬半壁高竹林瀟灑地應有醉山濤

送許時用還剡

宋 濂

尊酒都門外孤帆水驛飛青雲諸老盡白髮幾人歸風雨魚羹飯
煙霞鶴氅衣因君動高興予亦夢柴扉

丁酉五月六日吳善卿宴諸公越城外唐氏別墅分得輕字

王 禕

亭館鑑湖曲開軒水氣清戰袍當暑換舞袖傍筵迎受雨枇杷熟
欺風翡翠輕杯行敢辭醉不負主人情

題劉君濟青山白雲圖

張以寧

野性夙所忻青山無垢氛落花一夜雨幽樹滿川雲鹿跡閑行見
松香獨坐聞殷勤招白鶴予亦離人羣

雨

張以寧

歷歷愁心亂迢迢客夢長春帆江上雨曉鏡鬢邊霜啼鳥雲山靜
落花溪水香家人亦念我與爾黯相望

崇德道中

張以寧

煥日菜花稠晴風麥穗抽客心雙去翼詩夢一扁舟廢塔巢蒼鶴
長波漾白鷗吳山明月到惻愴十年遊

八月至直沽

張以寧

野樂天低水人家時兩三雁聲連漠北魚味勝江南雪擁蘆芽短
寒禁柳眼緘持竿吾欲往拙宦自何堪

近無錫道中

張以寧

登橋隨港直聯木護堤偏邨落皆通水人家半繫船橘花香曙露

楊葉淡寒煙中土何寥廓黃沙人種田

雨發常山

張以寧

僕夫趣予起初日出林間既雨縱橫水無雲遠近山馬嘶芳草去
燕語落花閑且喜邊陲定長逢戍卒還

寄方壺道人

詹同

海上神仙館天邊處土星卧雲歌酒德對雨著茶經石洞龍嘘氣
松巢鶴墜翎都將金玉句一一寫空青

遂安舟中

魏觀

溪徑斜斜入柴門側側開一牛臨水立雙鴨避舟迴病眼青山豁
歸心白髮催何因蒹浦上野老共傳杯

玉華山

錫崧

翠巘千峯合丹崖一徑通樓臺上雲氣草木動天風野曠行人外
江平落雁中傷心俯城郭煙雨正冥濛

寓翠巖庵

胡翰

蓮社僧相引柴門客屢回日高人語靜風遠佛香來碧愛琅玕繞
紅看躑躅開便應從此老城郭有塵埃

偶題

王彝

旅舍多歸夢今歸夢始真孤城五更雨百死一全身短日同慈母
浮雲是故人欲辭城郭去漁釣老江津

客中秋夜

孫作

故園應露白涼夜又秋分月皎空山靜天清一雁聞感時愁獨在
排悶酒初醺豆子南山熟何年得自耘

下山近青柯平

王履

奇秀掩噴吼休論五十盤半生貪偃蹇從此解婆跚一礪破秋寂
萬松噓晝寒自知情太重不敢再回看

晚浦歸帆

藍仁

估客前年去扁舟此日迴煙生全浦暝風健片帆催桂楫看將近
柴門認半開鄰人攜酒饌歡笑慰歸來

方氏園居

楊基

回汀兼復渚迢遞入漁邦有港皆通楫無山不到窗
疏煙春隴犢深雪夜籬雁過客停舟問而翁恐姓龐

江邨雜興

楊基

判醉望愁醒愁因醉轉增已歸仍似客投老漸如僧
詩興風樓笛碁聲雪舫燈莫言渾不解此事野夫能

句曲秋日郊居雜興

楊基

漸老愛秋光升沈意兩忘雁聲將到枕蟲響夜依牀
薜荔千林雨芙蓉一樹霜故園叢菊在衰颯為誰香

窗掩輝輝燭爐消細細香無風寒尚淺有雨夜偏長
饑鼠搖空橐枯螢委破囊十年江海夢此夕詎能忘

欲往竟無適意行仍獨還猿聲黃葉寺牛背夕陽山
書棄將成業身投未老閑相逢莫嘲笑才與不才間

送句容劉少府回揚州

楊基

家具一車輕囊書與短檠吏多難別意人有去官情
帆影江沈寺簫聲月到城竹西尋舊業煙雨綠蕪生

立夏前一日有賦

楊基

漸老綠陰天無家怯杜鵑東風有今夜芳草又明年
蠶熟新絲後茶香煮酒前都將南浦岸聊寄北窗眠

沙河至采石

楊基

舟中逾一月驛路及三千老淚青衫上新愁白髮前
蛩聲秋岸雨鴻影暮河煙不有西征客誰同此夜眠

零陵

楊基

古瓦籠山葛荒碑仆石楠江晴初漲雨城午未銷嵐
甕富鯖羞鹿杯渾酒餉蚌邦人盡麻桌終歲不知蠶

送孔提舉航海歸曲阜

袁凱

宣尼老孫子白晢更長身家世誰能念干戈獨愛貧
未聞興禮樂還似泣麒麟今日乘桴去魚龍莫惱人

送李高士歸荊州

袁凱

南京高宴罷西土遂言歸江路猶殘雨荆門正落暉蓬生仲蔚宅
秋入老萊衣明日思君處蕭條鴻雁飛

丙申歲書懷

袁凱

素書猶在篋白髮忽盈簪空費千金學何嘗一稱心呼雞秋岸遠
飲犢夜江深欲問三遷術陶朱不可尋

遊會稽山

袁凱

山實揚州鎮人踰浙水來禹功懸白日秦刻卧蒼苔龍起梅梁去
神遊石洞開明朝有餘興更上越王臺

池上

袁凱

秋池行樂去秋樹色已暝露下夕衣涼月上風簾靜飢禽墮疎竹
鳴蛩出深井夜久人事息蕭然諸念屏
振衣書齋客逍遙池上步林隈薄霧起石隙幽泉度鷗迷夕樹返
魚觸秋荷去清聲水上來欲去更延佇

發新河次韻

管訥

自忝王門祿頻年此地過秋風迴遠道暮雨宿新河白浪鷗邊小
青山雁外多客杯相慰藉一酌總恩波

中秋和龍子高

唐肅

白白初懸月青青不盡天乍經銀漢外又滿碧窗前鍾阜思歸夜
淮城坐謫年曾揮兩行淚愁對一輪圓

徐雪舟為畫藍澗草堂圖

唐敏

碧草連書屋蒼山對畫圖鶴巢秋樹小漁艇夕陽孤野色晴初遠
浮雲淡欲無浮楂倚盤石把釣任潛夫

順昌道中

唐敏

蓐食鳴雞曉空山啼鳥春遠鐘何處寺殘月獨行人書劍嗟黃髮
江湖起黑塵南遊未得意北望正傷神

梅溪宿徐橘隱寓舍別後寄謝

程國儒

不見故人久吟愁入鬢絲試呼邨舍釀細論草堂詩夜雨西窗燭

春風別墅基滄洲如有約歲晚共襟期

送地理劉漢章

鄭韶

留也東甌士能探郭璞書曰陰曰陽處某水某邱餘壤隧飛金雁
陰房葬玉魚荒唐千古事吾欲問何如

次沈生江邨韻

易恒

一逕漁樵外孤亭水樹間池春芳草合庭午落花閑僧爲徵詩至
兒因貰酒還卷簾看野色微日下柴關

樂圃林館

張適

結屋渾依水爲扉半是柴雨紅花落檻地碧蘚鋪階去住梁間燕
公私水際蛙清遊多感慨濁酒始開懷

林密簾櫳暝門清樹石連合香乘雨霽壓酒及花前嗜古思先輩
傷今話昔年何由清鬱抱春茗淪林泉

西溪步歸

張適

溪南山曲折舍後水西東樵唱千邨雨漁歌五兩風犬憎移竹叟

鶴避掃花童彷彿吾家近茅堂碧樹中

邨居雜賦

張適

野路經行處危橋入徑迂牛身栖燕子鳶爪帶雞雛水涸鮮鱗少
邨荒好樹無斜暉山斂夕渡口立斯須

茆屋路西東窮山石徑通鐘聲斜照外人影落花中水舍看曾叟
柴扉飯犢童時時來接語一笑亦相同

元旦後一日劉德儀送酒

沈周

使者雙瓶至蓬門向晚開停肩慰泥滑解幕省香來染指憐佳味
挑燈引細杯明朝攜榼去江上候新梅

晚坐

沈周

春殘尚絮袍林屋氣蕭騷白日苦不夜人生亦太勞泥花方失勢
雨筍漫爭高小酌仍觀物新醅愜老饕

送程宮詹

沈周

車馬出春明雨中人獨行人從今日去雨是幾時晴靜閣一杯酒

亂聞千樹鶯故山堪注易天意就先生

金山寺吉公房小酌

沈周

嘗惜忙未到到來方悟閒過江如隔世入寺不知山風氣薄詩骨

夕陽浮醉顏古人誇一宿三宿我才還

祝允明

自末春入初夏歸舟即事
往往花移色交交鳥換鳴雲將京國遠水別衛河清高嘯迎風轉
低眠看樹行殷勤吳郡酒還得此時情

飲酒

文徵明

晚得酒中趣三杯時暢然難忘是花下何物勝尊前世事有千變
人生無百年惟應騎馬客輸我北窗眠

明文在卷十

